



14
1544
147



14
1544
147

童山詩集卷三十

綿州李調元雨村

辛亥

秋興二首

屈原撰卜居王粲賦登樓出處雖不同感秋同一愁我
老筋力衰豈真好遊遊况復寡素心遊亦無朋儔豈無
好花竹荒蕪不自修豈無好亭臺有戶多莫由倉箱亦
千萬豈無稻梁謀室家非不宜豈為缺溫柔如何春徂
秋車馬尚不休朝向郵傳過暮向酒家投風既失高
百鳥羣相翔虎既過曠野犬亦交相羞歸與竟何時母

童山詩集卷三十

14
1544
147

童山詩集卷三十

綿州李調元雨村

辛亥

秋興二首

屈原撰卜居王粲賦登樓出處雖不同感秋同一愁我
老筋力衰豈真好遨遊况復寡素心遊亦無朋儔豈無
好花竹荒蕪不自修豈無好亭臺有戶多莫由倉箱亦
千萬豈無稻梁謀室家非不宜豈為缺溫柔如何春徂
秋車馬尚不休朝向郵傳過暮向酒家投鳳既失高岡
百鳥羣相啁虎既適曠野犬亦交相羞歸與竟何時母

乃非良謀鸞鳩笑鷓鴣知者惟莊周

我蜀多才人皆爲文字官皆不擇細行又皆竄夷蠻唐
之李供奉長安酒家眠朝賦清平詞暮窺夜郎天宋之
蘇學士歸院撤金蓮再貶至儋耳行歌饁婦前新都楊
修撰博學冠明賢撼門謫金齒傳粉雙髻鬟古人不得
意大抵皆放顛吁嗟俗眼人焉能窺聖賢

秋興第三首題東岳寺壁

小坐西昌寺軒窓漏夕陽低昂踏枝雀斷續隔林蟹
事皆機械吾生且徜徉詩成請問目秋興第三章

題柴豹文書屋

柴子胷中萬卷該從師千里蜀中來數椽茅屋臨汀起
十畝桑園背郭開滿座春風任瀟灑空庭明月自徘徊
只今誰抱西州慟惟有羊曇不勝哀

綿州潘使君招飲觀劇力辭催役不遜被斥進諧
不得已復赴席戲占

生來癩性愛山林每夜招留實不禁魚鑰已收伶未散
牛膏見跋客仍吟不妨曾子成三虎幾使王良獲十禽
一語不交仍復坐歸來又是四更深

玉京山訪琴道官劉虛靜時戴劉二生先在

步屨玉京山景樂闕虛敞山靜寂無人但聞棋聲響戶

童山詩集卷三十一
外有屨二排闥竟入幌不復論主賓脫帽同抵掌地既
曲且幽天氣亦清朗秋陽曝人背茶罷汗流頰菊花翻
東籬淥竹映西廡雨肥蕉葉大林深石芝長香櫟何馥
郁乃知此處廣贈我攜袖中芬芳自天上本鮮俗累牽
又獲同心賞經旬任綿城得此一日爽回語琴道人明
日再來訪

金山舖懷祝芷塘侍御時已罷官南歸

屈指瀛洲友相知獨有君童顏持漢節皓首卧江濱仕
宦麒麟植詩名虎豹文綿州分手處回首惜離羣

聞孫補山相國重膺簡命節制四川喜而有作

西首

黃閣元勳再鎮邊岷峨歡氣遍閭闔屢章臯出塞兵三路
嚴武回朝帥兩川燮理陰陽沾澤溥節和風雨沐恩偏
老農家住金山下望見旌旄喜欲顛

和如靄日肅如秋百鍊堅剛遶指柔師誼未忘存趙氏

公房師義烏令趙宏信已沒君恩深諱伐交州公征交

惟孤兒在華陽時加撫恤破其城封爵上公旋因兵

敗鐫爵有稱公者皆却之五銖不待黃牛復蜀中自乾

年後錢多私鑄以至小錢兼行商民交雙轂爭看白鹿

輪如此福星如久借九重西顧復何憂
文武才原將相兼運籌難得是神恬一車兩僕清如水

萬騎千軍靜若箝竹馬兒童望風拜杖藜父老惜霜髯
就中獨有支離叟感泣私襟涕盡沾

歸來鴛鴦化鷗鳧只把烟霞自樂娛得句每遭人敗興
清狂非是自卑污愧非徐孺叢分榻豈料文翁再剖符
從此漁樵亦安堵殘山剩水住妻孥

閩中廣文張景仲延文保薦入京路經左綿王汎

司文思著席間贈別

吏治聯翩薦廣文菊花時節又逢君牛刀初試毋輕割
虎帳雄談幸得聞南部吏才天下少東湖詩叟孰爲羣
修門如見諸昆弟寄語鬚眉白一分

重過鄆都廟有感余舊啟蒙塾也

此是當年舊書塾童蒙于此課初爻晨興撥草尋蛇窟
晌晚攀枝採鵲巢每以收威遭夏楚偏于覓句解推敲
如今老矣全無用回憶趨庭淚欲拋

奉和綿州潘使君詔齋邦和重陽前一日六十初

度寄兄四十韻

人生歷寒暑知着幾花胛貢諛強名壽每爲百憂憎錢
鏗七百年倏爾纔一霎不如醉劉伶遣人日荷插吾綿
有賢侯今年適周甲四方賚羊酒羅列相排壓火棗與
交梨瑞氣接萸萸而公澹若無力卻恒若怯豈曰矯枉

哉此理不待喋意辭諸賓拜謬以兩童夾大厦陳穉瑜
 避居退寢狹風雨近重陽官醞一瓶恰採菊有東籬南
 山高巉巖自醉還自壽險韻五言押忽憶鵲鴿原思之
 心欲拍一日如三秋似歷恒沙劫白首各天涯豈忘髫
 年狎詩成聊代書兼問田園業詞比金石堅義重載書
 歎飛鴻自天至緘封寄茗雪維時木葉下江波正泅渌
 翹首望白雲不覺岸烏恰堂前沸笙歌海錯間紫蚰公
 心清如水長吟口不嚼喻翌日乃張筵小飲但煮鴨酒
 酣出奇句詞源倒三峽嗟予老更狂滿鬢茱萸挿逢秋
 例登高誰為接驩洽一年強在外偃室未投劄家居何

所營庭臺種鳥翬夙仰高山名龍門並鷺硤欣聞介眉
 期齋沐睡不眨晨興領諸士城頭聽批鳩陳蕃榻敢望
 乃承孺子乏知我放蕩人如猿不喜紳脫帽舞翩躚不
 復拘禮法公亦起盤桓解衣時露鞞醒園有興無萬卷
 實遜鄴雖非習家池頗饒金視匣不嫌供給無尚可搖
 輕箠

附

綿州知州潘邦和詞齋吳縣

百年亦須臾疾如煮羊腍况復鮮百年鬼伯儘迫懣
 吾豈兒女哉露晞愁一霎海屋可添籌青山可荷鍾
 辛亥重陽前吾年正周甲僚友及親朋筐篋相填壓

芳醞傾玉盃珍筵扇厨楚共稱筋力强誰信精神怯
避席跪自陳繁辭不嫌喋家居虎山橋一徑長松夾
具區三萬頂規模豈甲狹探春香雪海梅花開恰恰
支砌接天平翠巘聳岌業明月蕩蘭橈芳風動簾押
池魚鮮可烹園蔬嫩堪摘小飲不立監圍碁不留劫
一室盈太和相親戒相狎歛南拜宗祠祖籍浙西理
遺業商籍浙和眺覽海與江往來茗與雪讀書第一峯
杭城紫陽山頂有吳山第一峯碑蘭譜多盟歆受福占王明不食虛
井渫伯兄性瀟洒烏巾或白帽獻璞一不收飄然採
石蠅笑我貪微名口張不能喻莊子予口張而不能喻矣未憶

歌驪予入川伯兄乙酉編謝鴨予攝屏山尉伯兄送眷至巳亥晤
宣城予由京至寧國伯兄泛舟來會丁未沂巫峽是年伯兄至江陽署兄年適
六旬帽簷花滿插旋及返家園末由恣欵洽迨遞斷
鱗鴻慰問疎緘劄丙午賦悼亡血淚沾棺翼權厝待
同歸樞葬富順西湖之白鱗背孤魂哭寒破哀哉河之鱖雨目何
曾眈未明卽催衣不用煩鴨鵝今吾猶故吾巴西暫
承乏龜玉詢在櫝虎兕防出柙恐遺隕越羞兢兢守
成法已屆還兵期古人十六還之何尚服韎韐釀王兼
麴部遠勝侯封鄴鴈影感秋懷蟾光悲鏡匣聽歌鶴
南飛沉吟弄湘筵

潘使君座上醉呈

五馬今朝座上親，名流不復數安仁。
推敲我始逢詩伯，鼾卧君當恕醉人。
笑把茱萸頻插鬢，猶嫌竹葉未濡唇。
夜闌踏月方歸去，贏得狂名滿縉紳。

潺亭山下有八十歲老人周士泰家藏明兩銅爵
上有成化十八年羅江縣置九字予購得之並紀
以詩羅江今改綿州

人間何處是滄桑，生把他邦換此邦。
丁鶴歸來城郭變，兩銅爵上見羅江。

九月二十九日出南村至楊家菴

撲面霜風水漸冰，山翁袖手又重登。
烟江有艇聞呼渡，野寺無人但見燈。
草上有時走狐兔，空中何日下鸛鷹。
池塘十畝願頻采，無數龜魚祇缺罾。

久雨忽晴

昨夜三更雨，風聲半在松。
今宵一輪月，影挂最高峯。
蚊拍手中卷，蟬鳴耳內鐘。
明窓紅日上，欲起更成慵。

晚晴

柏葉如楓葉，松聲雜雨聲。
隔林千嶂遠，對寺一峯橫。
白鷺雪初下，黃花霜倍明。
鶉鳩殊好事，向我報新晴。

紅菊

童山詩集

卷三十

小寺有紅菊開窻見兩叢不知過晚節錯認是春風欺
我顏非少夸他樂費工未寒何用火艷艷向人烘

奉和綿州潘使君詔齋遊醒園枉駕見顧得歸茅

屋登萬卷樓原韻四首

好風今日至秋日本多佳太守行山縣吾家在水涯青
苔方鑱徑紅葉正鋪階十載踰垣慣今朝慰風懷
尋花窮水墅觀稼上山樓屏吏獨登巖携僚欲枕流松
間頻坐嘯竹下忘歸休自是詩思誤非關意豫猶
好古有奇癖登梯無用攙我猶手未觸君早日非凡讀
畫匣都啟抄書板未劄自從航載至誰則解披緘

萬卷足今古千秋獨醉爾偕君一攜手頓覺兩忘形文
字前生蠹功名欲曙星不嫌書室狹重對罄餘瓶

附

潘邦和

琴鶴貽謀遠雲龍望氣佳几筵新涕淚遊釣舊生涯
草色青迷路苔痕綠上階高臺瞰四極秋意澹人懷
已陟萬松嶺還登萬卷樓泰山兼土壤淵海納川流
滴露晨光起然藜夜未休古香如可挹欲去更夷猶
才疎餘短髮祿薄仗長攬自信心常逸人嫌骨本凡
問奇探奧窅學語仰雕鐙勿屏門墻外因風惠一緘
座上客俱醉園中人獨醒鷄羣常混迹魚服欲潛形

瀑水升卿月京門頌福星 主恩不遺舊名已貯金
瓶

楚館有懷安縣施張兩明府

大安兩賢宰俱與我綢繆盡是南方彥常停北郭騶政
聲比鷹雀仁術易羊牛禪榻皆曾館秋風憶舊遊

觀鬪鶴鷄

鶴鷄有常匹飛不越草莽雖爲田鼠化性醇易爲養牙
角本相爭善鬪理或仿平原豆葉黃山隴麥田廣弋人
以聲呼先張以罟網其或兔脫逃則以鷄輕攘鬪之賊
市中狹斜見必賞色分紫與黃像辨鷹與象每逢羽二

稜其價不計繼盛之以錦囊各各牙牌榜茶滷晨洗膳
紅穀晚飼餉風和日暖時刻刻握以掌護嗉如護命引
翮兼引吭如此戰必克奏凱定不爽天下果無敵一博
可盈帑今年金山場東岳祭用享梨園演東窓觀者萬
人往康衢通錦城豪里多大駟開坊成鬧市紅塵競奔
鞅開局尋搭對勝負賭鉢兩兒童走相報老興技亦癢
其時甫初晴夙興披鶴氅天旣肅以清地亦更諸埭翩
翩兩少年各占矚瑜上洒掃剪絨茵金距一齊放疆場
圍以羅大小等盆盎微啄戒飽餐遺矢徐搔痒瞿然竦
其翼倏爾搏厥頰翮鬆怒爭赫膺膺聲益響意惡山中

讀山詩集卷三十一
九
狼氣吞赴壑蟒三鼓氣不衰百鬪神愈朗伺殆倍峻嶒
稍憇加骯髒非讎如共國雖勸不釋仗塵醋皮屢傷隅
負頭每搶項刻雌雄分毛血流泱泱喧聒如堵墻洵然
震康貴贏者喜揚揚趣取彼豎藏輸者色悽悽恨欲首
撲礪會罷復攜歸仍復露平敵事後論成敗聰明盡夸
獎苟無先見智高談我亦儻吁嗟此小駕何足置諸想
俗斗違違言孺子被欺廷踈蹠忘其疲空令金錢枉不
有博奕乎亦與飽食做豈無田可耕豈無絲可紡梓匠
有輪輿商估有船輜縱愚不讀書何至飢拾橡捩衿見
肘日曷以見親黨書此以規世或可醒昏罔不變而之

善祇堪以蓼釀

讀岳忠武傳三十絕句

萬古功臣萬古冤精忠報國背堪捫至今獄案無他語
天日照昭八字存
中原百戰恨難平只道君王自罷兵十二金牌魂魄冷
方知長脚誤蒼生
柑皮爪畫精忠命小紙書殲大將身當日臨安菜園土
荒墳猶諱賈宜人
中原腸斷請仙詩英氣長存九曲祠莫向臯亭山下過
伯顏魯祭岳家旗

弱冠操椎八十斤軍中都號羸官人可憐百戰名俱一
到死功勞未上申

一鼓能擒郝白巾閩中觀察閩中人岳家愛將無辜甚
街口如今祀烈神

一家忠孝姓名香高祚安孃已表揚獨有鐵崖新樂府
銀鉞怨裏訴興亡

家存御筆煥天章拘沒都還內庫藏怨鶴故巢猶在否
江州原是舊家鄉

中興立誓作功臣刺繡為袍字尚新獨有蘄王心最苦
題詩常憶翠微人

西湖之畔北山湄異日朝廷必購屍棘刺寺中遺屬在
果然隗順是奇兒

眼分大小識先皇鑾馭初歸自朔方悞殺岳將軍不見
深宮從此道家裝

哭聲如震顛天求到底公心萬代留一自鄂王謚忠武
岳州不復改純州

張韓劉岳四名將南渡功名共頡頏誰料是非千載定
鐵人添鑄鐵山張

明正德中都指揮李隆範銅為奸檜及妻王氏万侯高像跪西湖墓前萬歷間兵備道范棟增張俊像俊一作王俊按張俊人稱鐵山張岳之事張力為多後撫臣王汝訓沉張俊王氏于河今復鑄如初

金會議定遣秦歸聞死方知莫毒予當日壽皇知也未
又來洪皓蠟丸書

一腔忠憤性生成議論剛方必力爭自跋御書曹操後
殺身禍已此時萌

大臣面諷有誰知至德無師主善師痛飲黃龍成恨事
暗中兀朮早書遺

廉頗雖死凜猶生諸葛曾書善用兵望斷撼山軍不至
兩河父老盡吞聲

靈旗鐵馬尚嘶風宮殿栖霞落照中誰把賀蘭山踏破
空教淚洒滿江紅

當時兀朮已收兵號令燕南盡不行內有權臣身不免
先知叩馬是書生

忠似汾陽偏有福宛如道濟更兼才孤臣尚有藏埋骨
五國游魂盡作灰

北人奸細南佳士要算心忠兩國間南自南來北自北
徽欽從此不生還

殺監乘舟底用猜記程航海豈能來薦賢却笑胡安國
血破羣疑有李回

長舌從來是厲階誰知陰險善安排但經冲正先生口
毒過中丞肉簡牌

讞誣只在稟山陽
迢遞淮西計亦良
莫怪小人多反覆
平章依樣害平章

皇天后上此心知
指斥乘輿豈有之
告訐兩王俱反噬
至今只罵皂雕兒

秦頭太重日無光
錯摺頭巾聖相裝
獨坐中書書剝字
申王真似剝皮王

一經共賀能教子
五世方知斬已遲
王氏子爲秦氏後
誰言天道竟無知

造諸惡孽似蟲蠅
豈果前身雁宕僧
五十三人如不病
魏公大獄又當興

殿司小校亦微員
刺客從教白挺懸
舉世盡無忠義氣
男兒畢竟讓施全

靈隱留題地藏詩
權姦未死已魂褫
鐵枷獄比風波險
傳語東窓悔已遲

金山雜詩三首

森森無患木陰稠
東岳行祠在上頭
土竈然箕箕又滅
刪詩惟借佛燈油

入夜何須秉燭遊
天街自有月光留
人聲已靜雞聲起
誰對疎燈話酒樓

緣檣升木似猿拔
直上刀梯若等閒
愁到連年愁不得

割愁幸遇劍鉞山

送補山相國至西藏二首

羽書飛電馬飛雲知有番僧進表文 聖主只今無量

佛何須達賴請三軍

相國威名再鎮川也隨竹馬拜轡前道旁執手霜髯戟

想見愁眉火欲然錦州為西藏必經之路就近迎迓蒙垂問家况而須髮較三年前班白矣

贈馮鈴轄

斬草除根易為民去暴難桂符千里盡鉦鼓萬家安昔

法常懸棒秦旗恐卓竿將才君定可誰與薦當官

行李歌

我馬既瘠行李累矣從者皆病腹告匱矣日暮叩門
也吠矣張燈圍爐寒色退矣嘉肴脾劇肉食媿矣有酒
如澆客既醉矣主人且去吾欲睡矣

唐園見菊花

剖面寒風似剪裁羔裘擁鼻覓花來蜀中節候無他異

黃菊多於十月開

臨安太守張蔭堂玉樹以書求函海却寄

有客潺亭暫解鞍新從膠牧守臨安隼輿枉駕偏相左
始信人生見面難

聞道官清水一潭獨于典籍有奇貪吾家函海貪尤甚

萬里長須達遠函

誰似才人康德涵武功縣志早沉酣他年如續龍門史
補入張堪作美談

碧玉峯頭霜雪中山茶如火笑春風倘逢驛使錦江過
先寄滇南鶴頂紅

喜什邡甯湘維明府枉駕見過分韻牌集詩二首

聞客來蓬徑呼兒正葛巾倦蹤過北郭謳詠動南鄰地
以名賢重天開老眼新幽居垂訪問危坐話寒筠

村僻本孤寂胡然車馬馳流觴學飛羽集句當敬慕人
擁柴門看家慚出饌遲山林來好客鹿豕女休隨

除夕

少喜流年增老懼流年去流年仍率常喜懼各分慮偶
見塵埃掃又驚日月除屠厯名雖佳分明老堪惡桃符
何必換轉眼門闕故今年稍光輝刺史蒸豚購安州曹
汎司亦有香麈賂藉此潤筆資供我口頭饅自斟復自
止病齒每搯箸坐令山妻憎負此賢內助

此山...
 長...
 小...
 續文

童山詩集卷三十一

綿州李調元雨村

壬子

元旦三首

昨夜歲仍舊今晨歲忽新同此一夜中已分兩年人人
 老添是減人少縮是伸老怯筋骨禮不敢出迎賓少奪
 卿力強走遍東西鄰不如且高卧庶免客生嗔待其酒
 食去然後起着巾晨鐘發深省默數平生因
 天既生吾身必有吾身事就身所應為暗必合天意寡
 過時內悔知非尚無愧究竟不知天置我身何地譬如

產木材雕斲爲人器芒刃用旣鈍豈免投閒置蛛網與
塵封不復珍篋笥變化亦有時數惟管輅識
我歸今八年成功甘早退山林歲月寬尚可任恣肆優
游養性天聊以守素位以云身衰耗須髮尚青翠以云
身剛強行必藤杖侍似弱又似強不知天所畀旺羸與
盛壯我聞有元氣金丹誑愚兒往往翻受累神仙吾不
爲期頤由自至書此以自賀詩成身已醉

初一日南村觀捕魚

聞呼溝上捕魚來要算新年魚一灾破袴脫時持筭去
拈鬪賣罷得錢回西疇田父爭春水南圃園丁報早晴

惟有老人扁室坐天寒自撥不燃灰

小西湖初成 并序

余在通罷官每日思歸遂見之夢夢中輒見南
村屋左有荷池池中樓臺掩映醒問自川來者
皆以爲田然不夢則已夢則如是余心度曰得
勿使化田爲湖後半生居於是乎果爾得歸當
成吾志自是不夢今名小西湖遂初志也

內鑿方塘外鑿堤一朝鑿破夢中迷不栽便有菰蒲長
纔種旋看竹樹齊十畝肥饒化魚鼈百年浮沒任鳧鷖
更移紅白新繁藕要當西湖在屋西

十二月立春雪

不是草萌動春來人不知小梅纔破口弱柳未成眉官
有土牛送鄰無金燕遺雪知時節暖墮地故遲遲

元宵

元宵爭看採蓮船寶馬香車拾墜鈿風雨夜深人盡散
孤燈猶喚賣糖圓

春望

十日陰寒懶出遊偶來平野豁雙眸喜晴楊柳舒青眼
妬雪梅花笑白頭隔樹一鳩啼午寂並巢雙燕訴春愁
誰家墻外花枝好破費黃封一日留

龍骨車

卽漢書翻車也

歷歷錄錄車翻轂汨汨沒沒水出腹渾如木龍露骨筋
昂首噴珠傾萬斛恍疑白日龍戰野其血元黃走平陸
又疑黃帝禦虫尤驚散魍魅鳴獨角呼日吸月三十輪
旋乾轉坤百千軸坐令滄海變桑田頓教蘊隆飛霹靂
農人告我春已至西疇苦乾無滲漉陂池積有雷公水
肩斗無功槲力弱惟有脚車實如龍輻片鱗鱗收效速
清曉肩車向平陸四人迸踏雙輓輓水滿耕犁覆以杷
灌溉陡覺成膏沃激泉可使躍過穎踰溝可遣遍深谷
二月三月躡躡勤高原低原稻穀熟翻翻蛙坑長科蚪

激激牛溲生水族每逢天旱人忙時柳陰赤足袒衣服
我聞此言喜加額歛袖旁觀親擊目常疑人巧奪天工
始信冬官多闕牘雲雨須舉足勞何獨兩手能翻覆
吁嗟假龍尚如此真龍愆霖罪何贖

過德陽縣有感

縣令王學濂先君兩子門生余葵未
同門也先君觀歸咫尺不叩詩以刺之

十年閉戶守蝸廬長為離羣歎索居莫怪宦情如水淡
門生也寄絕交書

登庸衣鉢亦相傳盛事今夸縣令賢絳帳未遙空總帳
後堂不復到彭宣

禮闈曾伴赴瓊林況是通家世澤深記得孫公園唱和

金魚分贈結同心

錢塘師誼道尤尊前有袁枚後有孫

袁子才有寄座師
鄧遜齋詩云乃知

師恩厚還在父母前孫補山總制全蜀其房師
趙宏信已故未到任即登堂拜母重卹其孤不近人
情今再見只須痛讀辨姦論

紅牌樓

山色溪光處處迷新鶯喚我過橋西柳經霜後綠初染

草帶燒痕青未齊烟簇紅樓堪繫馬日斜白屋欲啼雞

誰家鼓吹爭迎客環堵摩肩擁衆擠

有為其親死而求題木主者作詩自嘲

幽居種樹愜幽情苦被東風勸出行人白狎時吾自敬

主方哀後我方榮聊妨竹下關門嘯只少花間喝道聲
猛記髯蘇詩大噱官銜只好寫銘旌

雲菴送梅

不知誰主與誰賓聞有梅家便鴛輪老眼看花真似霧
枯身如樹又逢春水邊萬點望無際竹外一枝斜有神
林下美人如許聘要同和靖議婚姻

二月初一日安縣張薌圃仲芳綿竹裕容齋德雨

明府聯車過訪云州尊翌日即至

聞報兩旌至柴屏淨掃埃雙鳧白天降五馬幾時來林
鳥知官噪蘭花爲客開容齋狂興在作客亦攜醅裕明府白

帶綿竹
大麴酒

再至睢水關

地入天台數在還惜無飛脚試辱顏時平早撤黃花戍
日久猶聞白草蠻割漆山翁腰黑桶鑄爐炭客負黃鍰
年來漸覺南山盡斬伐還愁造物慳隔江亦有天台山

紅梅四首爲李雲菴題

月邊原媿娜雪裏倍精神只爲無人愛胭脂畧點唇
冶翠鴛紅日擔風握月時不因香透骨錯認小桃枝
深宮憶壽陽倚媚臥含章點額人何處居然五出妝
自是美人種臨風倍覺嬌倚闌羞不語但見頰微潮

擔炭行

路入睢水關嶺岨通一線詰曲遇來人背挑無非炭斑
白亦負戴單衣纔至斛任重杖乃興挾髓皆流汗滿面
烟火色十指黑如澱問翁炭何爲答言衣食銜關內有
黃敞記里三舍半山高多杼櫟伐薪利用煨其地鮮稻
秬斗粟百斤換炭賣復易錢錢復易米爨以此老筋骨
顧口復顧脊豈無高岸坑屢躓脛輒斷豈無蛇虎傷見
則奉頭竄隆冬雪霜天努力尤不倦豈不畏饑寒但憂
炭直賤去年成都府錢小不堪買私鑄塞其間甚爲民
不便大吏聞當宁行文各州縣盡繳青蝦蟆洪爐重鼓

煽開局摩訶池催炭急于箭睢水炭所出奉令孰敢謾
老少俱供役牽挽走出棧十日一往還得錢甫一串燒
木磬南山尚不輸鎔鍊公鑄私又攙新錢舊復揀今年
府東南民好又改變只用辦子錢一槩斥爲贖官禁抗
不從那復懼鼎輾漸至錢不行貿易只米麩以此代憂
天常抱杞人患斑白何足惜疲癯亦已慣今年復來年
聊借炭爲參但使不擇錢溝壑填不怨

從什邡窳明府湘維乞西湖紅藕移栽

去年曾記謁琴堂繞邑荷花十里香無數行魚聚圓葉
有時睡鴨蔭垂楊主人蘊藉山平遠客子浮沉水渺茫

豈料歸來臥邱壑高軒重枉過茅莊

破費溪西十畝田鑿池引溜漸成淵人言書塾宜栽杏
我愛方塘雅配蓮惜少凌波如子襪難稱貫月米家船
西湖佳藕如容覓記取紅粧萬朵妍

送朱樸園德璋歸宛陵

我方與君遇君又舍余回酒渴因慚李詩窮不讓梅謂

太白梅 晚山從此去潺水幾時來倘憶南村老瑯嬛試

一開君攜余所轄函海回南

九華山和九臯韻

地湧大華岳天生小劍關雲巖垂細髮風磴裊頽鬢樵

叟恍雲際僊廬忽澗灣渾忘東海遠只在袖中間

醉園桃李甚開簡潘訥齋牧伯偕蔣參軍同賞

頻年跡跡似踰垣老病逢春只避喧誰使蓬蒿開竹徑

頓將桃李比芳園鄉風共試郵筒酒往日空遊下澤轅

更有海棠開爛熳題詞應續石湖言范成大詞只為海棠也合來西蜀

小屋西邊偶鑿池水栽蓮芡岸栽橙欣聞太守停驂馬

頓使山人倒接羅魚躍晴波知逐客烏拳風葉聽吟詩

他年着個茅亭子勸稼來時好拄頤

附

富順令署潘邗和詞齋吳綿州知州縣人

文光上徹紫微垣調進清平早息喧為問軟紅馳北

關何如濃綠集西園詩箋寄興龍吟水宦況驚心駒
在轅君已迴輿儂叱馭相看一笑不須言
欲借清陰蔭小池益州方物木稱橙風流座後饒絲
竹疎野人前著接離人仰羣公能作賦何緣俗吏勉
題詩不堪草舍多繩縛五鳳樓題妙解頤

寒食姜詩墓觀賽

姜公邱壠絕樵蘇寒食千家挈酒壺百道靈泉猶躍鯉
萬年宰木尚啼烏赤眉當日防驚孝黔首今朝共賽巫
同是陳人偏血食幾多村墓紙錢無

玫瑰

深紅藏宿雨紫艷愛烘陽色裏應無比花中別有香
有堪餉客孤命恨離嬖最是天生潔偏宜近玉堂

仙女洞

在德陽縣北四十里

橫江鐵壁垂水溜滴成洞天工巧煨鍊琢石爲屋棟聞
昔有獵夫搜山失其衆忽遇兩神女採藥相戲弄便從
後尾之徐退恐稍縱翩躚轉山曲投身入石縫雙鑲門
自關叩戶撼不動但聞搗臼聲隱隱如鳴甕恍若出天
台不邀仙子送此語傳人間恨較劉阮痛至今洞已開
仙跡渺難供空餘鍾乳流不知作何用惟見兩石人馳
馬猶銜鞚我來訪靈蹟撫事一增慟駐顏少金丹誰賜

蟠桃種掉背猶相失後來況敢夢惟應每歲來花開聽
鳥哢

題黃生士璿迎旭軒壬申進士乃祖景書塾時門
前新橋初成

門生有幽宅信步到江邊全當踣橋過非徒趁酒筵蜂
喧停午日鳩喚欲晴天不速君休笑君翁我所賢

題金堂尉姚古愚松下獨坐圖

科頭松下者爲誰錢塘老友官晉熙十年驥足苦不展
坐令霜雪盈須眉我昔紫巖訪賢吏盡道士元日日醉
豈知積案咄嗟清百斗猶能書細字歸來作詩寄岑溪

蜀中仙尉無與齊平生愛客囊如洗晨炊往往聞饑啼
搗來金水重相見握手挑燈促開燕酒酣捧出秋興圖
要我揮毫書素練自言仕宦似鮎竿秋風夜夜驚張翰
昨宵一覺迴鄉國猶夢江頭飽食鰻古愚常言枕
州鰻魚之美此意
請君且休矣巫峽吳山隔雲水但教筋力老益強何妨
相思日千里

金堂訪禮曹高白雲先生故居見嗣君光魯留贈

平生師誼最關情絳帳重過記錦城雀入講堂悲伯起
草生書帶憶康成春風坐冷人稀到夜雪門荒我獨行
尚有傳家詩禮在趨庭故步早來迎

題雲峯雨窗夜話圖

春雨簾纖春晝長
修竹吾廬花木芳
主人留客焚清香
廣羅古畫開縹緗
中有一軸新裝潢
迺是雲峯山人庄
雨窗夜話書左方
展讀粵粵風生涼
梧陰籠院遮燭光
芭蕉滴瀝聲抑揚
中有三人共一房
小酌隨意羅酒漿
不知抵掌何洋洋
大半高論皆羲皇
上有欵傲董其昌
乙巳五月留蘇間
二客李生四明狂
落筆者誰近元章
長洲陳栻題其旁
迄今又閱八年霜
昔在平江今金堂
細雨亦復同淋浪
坐客換我與陳省建張中乃知聚會真
難常一別便同參與商
前後等視俱黃梁
况我鬢髮尤

老蒼能不披圖生激昂
觀君一舉醉百觴
隨我歌舞聽絲簧
醉即大笑億千場
免致各天空思量
安知不有畫手強
又圖今日雨聯牀

答何雲峯

竹林喜共阿戎語
聞道雞林問雨村
漫把詩名傳海外
為言寂寞老柴門
雲峯自京歸言朝鮮正副使者入貢俱能背誦予詩并問余消息
金堂署觀劇
雲頂名子已遍遊行騰
何意又攀留虛名
每愧陳蕃榻
佳句誰傳李白樓
禍福無憑皆自召
功名有定只看優
若將我輩登場演粉面
何人可與侔

得魏宛卿書二首

魏王船上客久別自燕京忽得錦官信來從繡水城謳
 推王豹善曲著野狐名聲價當年貴千金字不輕
 傅粉何平叔施朱張六郎一生花底活三日坐中香假
 髻雲霞膩纏頭金玉相燕蘭誰作譜名獨殿羣芳時都下傳
燕蘭小譜載樂工數十人以長生為殿長生即魏宛卿小名也或云小譜余秋室作

審金堂右尉署不寐

一生富貴沐猴冠待得歸鄉興已闌底事官衙偏不寐
 從來野性慣林巒

病中和四堵張玉溪懷淮智雲亭二首

病中和四堵張玉溪懷淮智雲亭二首

最是夏初好偏逢病裏過山高看月小亭敲受風多拄
 杖數新竹臨池摘小荷數旬兼止酒那許便高歌
 年衰難買健時過假稱高日月雙芒履乾坤一敝袍摩
 碑思補史諳藥解箋騷贏得妻兒笑胡為不憚勞

眼鏡與玉溪同作

眼昏無治法得鏡忽雙清全洗看花霧偏添小楷明玻
 璃鑲去薄黐黐帶來輕愛爾從予久新加老友名

附

張懷淮

明眼時愁暈奇文倩鏡收中分雙匣水共此兩輪秋
 怪道波初淨何堪石乍投睡餘拋卷後雪影枕間浮

鷹背崖

何年一隻鷹垂天下雲翅竦然不受鞬撲穎如裂背一
且化爲崖猶見鷹背利其立若愁胡其貪如何餌狐兔
未秋肥問何側目視母乃鼠竊多職掌失其位我來有
追逐正坐少趨鷲安得借蒼隼爲我一縱臂吁嗟速歸
來人鷹正滿地

頂雲觀

頂雲何其高孤絕出雲杪四面寡崕嶮竟如姑射藐髻
髻盤上天天風吹飄渺獨立何僊僊愈高愈窈窕五丁
不到處一觀峯尖小人言公輪般刻爲假神道我疑阿

育王同塔遣鬼造何地不生人何人不生巧牙頭亦能
炊天亦故相嬲又恐高無泉坐令道人殍分與一天盆
使以覓儲沼獨留續香烟不許旁人飽欲上無天梯何
處問瑤島微聞山中人採藥曾至嶠

聖燈山

聖燈果有無我聞心恍惚及至大安山細徑杳如髮十
里迺至頂板擠費顛蹶下看若無地上視乃平濶樹木
帶危亭飛泉挂崖窟每逢月上已拜香走勃窣男女肩
相摩觀燈候日沒臨岩人初靜乍見一燈發初如螢低
昂漸見火條忽須臾千萬點照遍各林樾有客向余指

禪榻尚可歇誠哉有此竒便欲從結鞵但恐未傳燈此
行終勃勃

草鞋街得僕

四山風雨撲人來不見樵青矢不迴踏破鐵鞋無覓處
不知却在草鞋街

訪吳隱居

草石河邊市來回已再經竹圍村寺綠山對店門青楊
柳三叉路橋梁兩岸亭更尋吳隱士買藥一瓷瓶

楊時西得子求名於余命曰玉麟並綴以詩

信是寧馨物他年柱石材如松千丈聳似桂一枝栽釋

氏曾親抱張仙自挾來玉麟名不愧試看首先回

山中夜行

黃昏村徑黑得火乃前途明月見而隱稀星有若無兩
邊疑陷阱一路總模糊風凜垂堂戒胡爲至此乎

宿龍藏寺

小寺纔容膝禪床暫挂單楚岫厭莊獄魯酒困邯鄲露
下人移坐風喧鳥未安更無龍藏度繡卷惜經殘

半邊街

迤邐不知路坡陀盡草萊數家臨水住一店背山開簷
引葡萄上窻迎籠竹來能容鼯睡否拚醉主人杯

沸水泉

久聞沸水名未識沸水面問堪到三堆始詫源一線初
如湯正熱釜底薪煨煉又若煮井鹽熬素雪花煎竊疑
凝龍伏吐咳珠璣散又疑魚濡沫鱗尾驚撇漩泯泯滋
爲渠混混注若旋四時科必盈五色石交炫綠淨唾不
能清寒嗽隨嚙遠過釣笑泉近壓神泉縣下流趨成江
分派開作堰楊柳插蔭翳葭荻互蔥蒨殆可溉千疇豈
止供百輶上有小蘭若不知何年繕遷喬剩遺基草創
止荒殿山高神必靈人禱霖屢驗以此屆年豐賽會交
祭薦吁嗟此醴泉擇地何不善平陸倘皆沃天下法

徧盡爲墮一隅只私山民便鞭縮諒不能袖手空健美

青雲山

青雲無丹梯平步上霄漢木末懸飛甍乃在天之半上
有奎星閣光射斗牛貫父老爲予言文章實未煥以此
新劇錢創業出里閭僻陋在山陬未遇名筆贊今幸得
主人倘藉翰林翰予聞始愧赧仰首忽生歎昔忝中書
堂曾侍玉皇案鳳凰不如我炫采比鵲鳴自從毛羽摧
灑灑草中窺局踏林莽中尚敢以文銜漫賦青雲詩只
作青山看

避炎

童山詩集

卷三十一

避炎如避寇逐北盡投林總似火牛逐思同水鳥沉
保妨松下卧詩稱竹間吟正好荷開日困園樹樹陰

六月六日題西昌楚館壁

禪房深映竹幽徑曲栽花粉蝶墻陰聚鳴蜩柳葉遮雲
濃知欲雨夕照忽橫霞雖在繁華地心清却厭譁

番麥

俗名御麥

山田番麥熟六月挂紅絨皮裹層層筍苞纏面面稷兒
饑燒作果郭啞釀成筒此日嘗新始貪饒笑蠢翁

過台子山視女時婿赴州

又飽少施食無慚袁隗妻斫芻因餵馬爲黍不留雞白

屋新經盜青氈亦盡攜可憐季長女掩面室中啼

戲作催粧詞四首

爲已故某令妾田氏私嫁作氏揚州人

落月窺窗燭淚紅飛花入戶怨牀空誰騎白馬臨門送
速捲衾裯趁晚風

揚州生長慣烟花回憶平山是妾家燕子樓空誰耐得
可憐人已抱琵琶

聞道東施善效顰幾回欲問碍情親昨朝再訪天台路
洞口桃花已屬人

金屋阿嬌夢一場羅幃昨夜又鴛鴦世間別有鍾情者
篋內癡藏半背香

江漲

江漲奔千馬山高隔九龍已驚橋盡漫又報路全衝雲陣連天壓風濤入夜洶何時霾盡掃穩杖一枝筇

潘訥齋過壽佛宮見訪

忽報高軒至相逢野寺談唾餘方媿拾余所著有唾餘新拾十卷函蒙覲吟藁復商參酷暑去諸吏清風生小菴不須臨水坐相對若沉潭

其狂真柳絮不遣梅楊枝自笑吾衰也當同君戒之標梅歌適願芍藥賦將離安得人間婦齊低舉案眉指田氏事

小西湖新種蓮花盛開簡寄湘維二首

春時初種夏全敷早見亭亭不染汚雨濯紅粧如乍浴風翻翠蓋欲平鋪牡丹比貌姿差遜槐子同心味豈殊藕是西湖移得至稱名合喚小西湖
昨朝薊圃什邡迴為說環城菡萏開苦少佳吟借汝和尚遲尊酒望余來放生魚鱉多希雨破浪蛟龍豈待雷後會何時期再約只愁座又缺鄒枚

小西湖看荷

誰開玉鏡瀉天光占斷人間六月涼長羨鴛鴦清到底一生受用藕花香

安縣張薊圃明府將之西藏從軍枉駕見過送別

四首

敗意偏當得意時茫茫天意竟難知人言失馬寧非福
我謂亡羊補未遲暫蹶霜蹄行外坂終看雲翼振天池
相逢握手還相笑贏得軍功竹帛垂

聞道終童欲請纓攀轅父老淚縱橫信知王粲從軍樂
却怨仇香出塞行錯節盤根新利器繭絲保障舊官聲
就中獨有支離叟無限臨岐送別情

家近安綿接壤鄉每逢花酒請琴堂時因拜母留旬日
暗為殤兒泣數行回憶板輿誰代奉每憐嗣續向朋商
此行只當勤王事漫向高岡賦不遑

甲冑何須必自攬從來忠信革奸頑三年重踏烏斯藏

君曾籌餉西藏三年十載全清白草蠻安縣為前明白草蠻出入所君前後蒞任十年而虞詡豈知能武畧劉琳原只列文班天留露布遲

君草倚馬飛看奏凱還

借曹玉田柴豹文楊峙西至吳村餞送張蔞圃之

西藏回輿過靈印石席地再飲薄暮乃歸

安州山水窟一一雲峯屯其中最幽秀第一曰吳村初
入路頗狹髣髴逢桃源山近得小口亂石疊為門門通
來往衢磊砢左右蹲高者敞夏屋低者羅瓶盆大者如
牛馬細者如兒孫中橫一巨石劈破不可捫聞昔有月

堂留此靈印痕至今稱鬼打母乃鄙俗言矗立負江滸
峻嶒巒山根地本饒水竹竹茂復成園赤日照不到幽
禽相啾喧時維六月望張君之西畚同人共追餞回車
畏炎暄曹子有雅懷謂此可避煩顧視攜榻中尚有餘
饗殮解鞍就石坐愛其樹陰繁不復相揖讓竟各恣啖
吞其時天無風但見羽扇翻野味雜豆菽沾酒添壘罇
自謂羲皇人尚留吾輩存何異秦一子訪道登崑崙坐
火山風來疑是雨聲誼命駕各歸去日色趨黃昏老興
此不淺作詩志勿諉

安縣少尉顧雨菴置酒城西樓招余及柴豹文

玉田楊峙西同登觀繞郭諸山欣然作歌

顧公當代風雅無與儔置酒安州城西之高樓繞郭諸
山次第出一一送入吾曹眸浮屠拱其南聖燈峙其北
犀牛喘月一回頭鷹嘴凌風雙竦翼就中一峯插天半
飄渺虛懸頂雲觀昔年飛仙曾一登撞落星辰倒河漢
東有奎星之閣西有翼泉之亭亭臨渡口列几案石堆
江觜羅障屏水鱗鱗兮山嶮嶮開筵適當西山缺酒酣
起舞風滿樓不知何處有炎熱坐中客有桓伊者三弄
笛聲歌九夏吾謂山水有清音何必絲竹紛紛也夕陽
欲下衣袖濕諸人猶在城頭立笑謂吾曹速排詩三百

年來無此集

鐵牛頭

何年黑牡丹泥深四蹄重力瘁筋力疲牧兒亦侮弄一
夕化為石如鐵鞭不動我從浮山來竟就鐵牛鞵馬競
蹀躞行牛負轂鯨恐勸君勿驚牛此物曾充貢挽石為
柱礎運木作梁棟曾荷天闈養半分乘田俸一自放歸
山棄置永不用昔日陪鴛鴦今日伴翁仲牛兮汝應知
辜負王恩重

小魚洞

四里坡而下有洞泉淙淙轉腹細若蠅出口奔如龍懸

崖崿翠處噴薄濺蒼葦散為白斛珠如米跳自春坐令
魚誤餌逐隊爭噉嚼諒無額可斃徒與乖供養我欲批
其鱗窟深不可蹤恐觸餐餐怒歎息姑爾容

黃楊坪

石性本至剛水見不敢遭水性本至弱石見不肯饒我
過黃楊坪瀾瀾不容刀秋漲來觸之且過且哀號始知
橫道人終為柔所撓轉瞬石盡出水已萬里逃慎哉母
狎水作詩示汝曹

觀音閣

江小灘益號山轉路愈隘但見石鑿鑿不見雲靄靄神

工解濟人佛法本無界中有觀音閣上倚石為蓋慈航
果有無隨緣歛頭會何以紫竹林不聞香醜鵲往來皆
茶商我乃無一貝笑謂千金子有錢暫稱貸

石嶺

江忽別山去嶺乃截江橫人如蚯蚓上路作蜿蜒行我
乘小籃輿仰天上崢嶸衆力扶之前乃反向後傾櫛櫛
十人抱檜枯千年生新翠變黃壤濃綠抽紫莖麤磨得
所養魑魅時有聲到頂天一握始覺雲四平劃出南北
界諸峯面畢呈隱約山缺處人烟見茶坪天為珍此草
設險護勾萌下山復見江又與江同程

小河

巉巖盡處一溪清便放肩輿步問程茅屋忽從崖裡出
板橋多在水中橫兒攀紅石偷番麥客斷青鞋續草莖
不為看山安至此大夫誰道不徒行

茶坪

千崕歷盡見平坡土俗山田不揀禾春雨足時茶戶喜
夏雲深處酒家多天寒六月無蚊嘍地僻前山有虎過
路近蠻荒碑版少鐵牌雙栢日摩挲

鐵牌雙栢行

并序

雙栢在茶坪後山張氏坐頭圍可五十抱各刻

樹臍釘鐵牌一面為明萬歷年間造蓋護樹願
碑也銘似咀咒文亦鄙俗左牌如故右鐵牌為
栢皮包吞入腹中留尺許一縫尚有二行字可
辨文亦同左蓋一鑄二牌也此地明以前為白
草青片出入之所故別無文字碑版 盛朝開
闢山陬海濱凡有血氣莫不尊親數典而至明
亦不啻上溯鴻荒也

雙栢屹立哉何蔚蔚鬱鬱而蕭慘圍可五人之抱兮高
可十畝之陰中懸鐵牌牌各二乃是咒咀護樹之銘箴
其文近釋其字俚不足摹倣不足臨鐵薄如皮半穿蝕

扣之但聞錚錚音其一完全不復損其一半為樹蝕侵
嗚呼古人畏咒咀尚可以牌禁今人有咒亦不畏故目
中栢無成林

入山

入山恐不深更入茶山坪父老知我至招呼相逢迎彼
此邀還家以我為人情瓦煤與葦管塗抹徒縱橫草書
不入格亦復龍蛇驚何以為潤筆村醪濁復清烹雞冠
爪具蒸豚椒薑并醉中復何言無非讀與耕我為父老
歌作息荷昇平父老亦不解歌罷雙目瞪

題弟惕齋烟波垂釣圖

何處山光如此碧花如茵縹草如席巖阿柳陰釣者誰
科頭白眼踞盤石余弟惕齋向余言此卽吾家魚田宅
繞宅雲峯皆嵯峨下俯清波爲鴨河神仙已去赤鱗在
至今遺得紅鱗多黔南地本居幽隩春來常傍西巖宿
山童安竈斫銀絲仰天獨酌家糟麴醉倒長歌無人知
惟有黃鶯和深谷一自看山到峩眉十載油幕殫巴蜀
夢中忽憶故鄉鱸醒來滿眼仍文牘寫作烟波垂釣圖
欲遣余懷時展幅知君高臥樂林泉可許餘風共追逐
聞君此語爲悠然我亦初歸負郭田觀君此畫高君志
何幸方亭共看蓮蓮葉雖已倒蓮花開尚好煩君豪飲

累千觴看我筆陣橫空掃掃却君眉萬斛愁揮架書同
李鄴侯况遇賢王老賓客酬唱詩牌與酒籌蓼花蘆荻
紛如織秋來水寫瀟湘色但教有蓮共吟哦何必苦思

山水國

武進縣令譚敷五經余甲午科粵東所取士也奉
檄運餉至蜀壬子中秋後二日道出綿城枉駕見
過詩以志別

譚君原是粵中賢倏忽離居二十年自分半生從范蠡
何期萬里到彭宣餉來川北時何遽官到江南歲易遷
臨去師生無別語歸吳早寄老夫牋


十二月初六日爲湘維誕辰以 國忌改初八余
携樂至什邡補祝是日湘維納姬將至而長君親
迎亦到

屢奉簡書催不到今朝携樂自還來病思花縣人俱遠
壽補桃尊讌並開歌管繞梁青鳥至結禱迎輜白駒回
樂天老去風情在尚爲楊枝轉屬媒

十二月二十八日荷花池紅梅書屋落成是日移
居自賀

也有亭臺也有船出門數步卽平泉愛香每向梅邊住
習靜常從竹裏眠新屋攜兒同襍被坐床少客亦鋪氈

堂成吉日無人慶自寫新詩當賀箋



童山詩集卷三十二

綿州李調元雨村

癸丑

癸丑元旦

今歲初交六十春居然忝作杖鄉人
屢經磨蝎仍無恙
亂草靈符尚有神
膳飲從遊隨日備
樓臺頻徙趁時新
京華却憶王門客
投刺今朝正逐輪
京師是日但端坐車中遣人投刺可

初四日携眷至曹大姑家賀新

又酌大姑酒紅爐盡室圍
雪消松葉健春早杏花飛米



貴飴糖少錢挑爆竹稀籬牢何患犬脯市漫呼豨兄妹
看華髮兒童笑覈肥已完向平債何恨老萊衣但使年
年會無妨事事違螟蛉終式穀教誨莫愁饑

感春

是物從新發惟余依舊衰眼昏須鑿鑿西洋眼鏡名齒缺怯
錫飴栽果何時大看花隔霧疑昨朝癡絕甚銀杏種千

枝銀杏亦名翁孫樹言翁栽而孫始得食也

春初蔣少尉蓮洲玉琳枉駕同登函海樓

上接青天下接潭請君樓底小停驂望江不見江還遠
函海何曾海可函十里菜花蜂採蜜百株桑樹婦繅蠶

民憂民樂居官事如此風光可似南

謝陸孝廉樹英寄端硯

樹英廣東高要人已亥中式余視學時所取士
也其父文祖為屏山令隨任至川遣人送硯

人遠懷矜峽書來自馬湖惠余好端硯因爾重明珠眼
潤驚鸚鵡斑新辨鷓鴣著書方火急肯令度闕樹

蓮洲送湖筆

誰把羊毫縛吳興筆匠纏齊各毛穎傳合配薛濤踐行
草隨吾意橫斜豈汝愆縱教俱老禿那及我衰年

初六日蓮洲座上聽燈曲戲贈

自是州城樂事多元宵未到早笙歌春蘭不用夸芬馥
遍體生香究讓他

人日蓮洲送芡實

聞有鮫人似海魚潛居苦織勝羅敷忽從機上雙垂淚
傾出盤中萬顆珠火任烹熬九倍小水纔畧洒彈偏蠹
我家正在湖邊住試問蓮洲有種無

初八日陳國璫送紅米

聞爾饒紅穀多爲養母儲分甘先惠及此意實憐子烘
出胭脂餅全疑莧菜蔬暮年今得補顏看少年如

題李鶴林

振青

聽鶯圖兼求墨蘭

今歲節差早正月柳已綠求友至綿城嚶嚶鳥鳴谷楊
齋始遷喬種花滿書屋墻東有高士如鶴雞羣出示我
聽鶯圖正際鶯聲逐春景與春畫相映合成幅昔有聽
鶯人雙柑以砭俗千載復見君肯讓戴子獨聞君善墨
蘭亦與春爭馥題罷索君蘭可能贈一軸

張忠送香櫞六株求薦

曾向泰安爲記室却歸綿水守空廬慣遲作荅年來八
特爲香櫞寫薦書

陸生見麟送紅梅二株移栽便邀同賞

屋名雖以紅梅錫尚少成林梅幾株但使着花三兩點

不妨老幹十分枯
蒙君割却雙身愛
使我新添兩侍姝
從此春風牢護惜
年年花放爲君酤

栽紫荆

窻外紅荆樹
村中陸氏遺
忽思兄弟事
栽與子孫知

精忠觀題鶴林墨蘭并序

乾隆癸丑花朝
余至綿竹偕鶴林
惕齋同詣忠武岳王精忠觀
觀鶴林所畫蘭及惕齋題跋
屬予題詩
岳王廟在南郊三里
蓋張魏公家曾藏
王送張紫巖北伐詩
後人因詩立碑
因碑立廟
故綿竹有岳廟
王湯陰人
鶴林亦生其地
其兄

爲綿竹尉故重修精忠觀
並添鑄秦檜王氏兩鐵人
跪廟前焉

曉謁精忠觀
徐步入幽室
忽見空谷中
蘭花石背出
謂是靈均種
無人春自茁
坐久不聞香
乃知是畫幘
鶴林忠州秀
生叶夢蘭
吉有時揮素絹
人與蘭爲一
王亦生湯陰
綿南有遺筆
誼切鄉梓
慟毋廢
換蓬葦
旣已廟貌新
復思金石述
緬懷三字冤
千古芳名溢
故令寫奇香
爭光月與日
題句媿同心
趁賽薦有飶
回看兩鐵人
遺臭何時畢

過玉局觀

在成都北十二里
賽雲臺今名壽佛寺

道經賽雲臺古刹聳林麓闕宮峙箐篁相傳卽玉局其
洞青城通其光鬼宿燭玄元于此居道陵有遺躅刻石
閉幽府鏤像貯深屋有人偶欲開狂風驚拔木不知廢
何時城郭變陵谷黃冠半羽化衲子聚成族至今太清
宮時有五色出唐像何處尋宋君好尤酷神仙亦設官
提舉假名目雖曰惜龐眉聊作老馬畜東坡宰相才遭
讒屢放逐自海移廉舒乃敕銜兼蜀其實未得歸徒沾
虛俸祿空令天下人來此每停轂飛仙我未聞思君我
心獨

宿妙相院馬射濱暨諸昆攜尊見訪醉後作歌

馬氏諸昆皆老蒼就中射濱白眉良知我作客苦寂寞
攜尊見訪東禪堂維時大雨正如注開窓共酌聽淋浪
不復序齒竟就坐轉瞬瓶罄空壺觴便有優伶解人意
歌聲烏烏兼笙簧枯腸得酒高興發亦自起舞如巫嬢
羣兒拍手父老笑此翁無乃今之狂我醉欲眠客亦去
覺來晚鼓聞燒香亟起呼僮吹火錄錄其一半其餘忘

燒笋 同雲谷作

西蜀饒林筵南珍產箭筈吾家水竹居對門篔簹夥常
愁稚子出竊被旁人裏園丁勸早燒帶殼計良妥不須
郢人斤只借燧氏火籜兮風其吹衰矣時當果肉食謝

不能禪叅意亦頗不交王子猷只友文與可食罷笑謂
君蔬筍氣真我

鼻烟 爲屏山令陸文祖作

烟乃口呼耳誰教氣吸哉種傳洋舶至販自海關來玉
碾霏霏屑珍盛小小壘玻瓈含潤澤琥珀映胚胎倒瀉
壺常側分遺帕甫開手拈纔一撮鼻嗅帶殘良乍屏如
無息相吹似有埃爲誰頻作噓不慣却妨哈香霧何須
喫醺人絕勝醅驅寒天不害辟瘴地消災貢品殊難得
多儀每走僮達官腰例佩對客讓交推老朽何勞餽功
名念久灰瓊琚何以報詠物出新裁

仙人橋并序

在德陽縣北二十里雲笈七籤云縣北十里秦
中治秦韓仲修煉之所一名浮中山橋所由名
也旁有秦真觀今爲驛站馬敞矣

嬴氏翦六國黔首無唯類賢者多避之桃園其一事云
何雒水湄亦有韓仲至得非武陵人別更居此地當時
巴苴平蠻風尚敦摯混沌日以鑿往來豎郵置流俗好
荒唐代遠傳聞異人謬稱爲仙吾特重高義古觀創何
年長廊繫駟騎田禾何時來候吏倦欲睡致令房牢落
案作馬槽餒仲昔于此棲吾今亦暫寄櫟柳一畝陰蘆

荻四面庇誰家牧犢兒猶爭角觝戲

遊慧劍寺登夢應樓

井序

慧劍寺舊碑有宋淳熙十有六年十一月甲戌
 邑人淳于震夜夢紫衣比丘入其家持化度牒
 既而又見持慧劍訪上人真公見其所衣之衣
 所出之書所誦之偈悉與夢同父子感異遂捨
 田三畝以充寺基不數年而真公果登正覺震
 亦陟顯位此夢應樓之所由建也事詳于寧波
 府同知邑人曹山夢應樓碑記碑為嘉靖二十
 三年春二月望日造見立于天王殿前其殿樓

則創始于正統壬戌僧源聰所建也壁間有五
 百羅漢畫像金粉脫落而神彩煥然洵明季高
 手惜為近時俗筆重描夫其真面目不免蛇添
 足狗續貂之嘆時湘維為什加令洗刷之功不
 無望焉同行袁生請紀以詩並限家字因素筆
 成人韻與山僧飯訖而去時癸丑六月二十一
 日也

殿敞花偏麗樓高樹不遮九層通日月四野聚烟霞青
 草蛙為國蒼松鶴作家客來供苦茗僧解飯胡麻古井
 何時塞波崙後嗣夸僧言寺為波割緣須慧劍應夢捨

腴畬壁有名人畫
播經俗手取誰能
重刷浣賢尹定無
差

時辰表

無針安解運有鑰
必須匙不出三分
地能占十二時過
遲蚊曉認大速馬
郵嗤底事中人產
徒供貴者嬉

藏佛

藏本生番地人稱
活佛天祇因能灌
頂多鑄小如拳版
釋非蘇晉思親學
閑騫每從深室裏
拜祝母添年

祝枝山草書手卷

張旭草書後端推
枝指生醉來頭濡
墨醒看目皆瞪儻

恍誰能識縱橫見
即明若言是才子
我亦有微名

和四弟編修鳧塘見懷三十韻

微官狗監慙早朝
雞人叫供奉常不
充書思頻入告僕
夫厭饑寒旁人羨
清要無嫌冷况多
所異日光照倘遇
典文衡志得展廊
廟八月主棘闈三
年提學校囊橐載
後車負弩競前導
桃李既滿門冠履
稱高踰宴客出餘
珍置貨任所好永
謝蟄龍蛇不羞鞞
虎豹吾家兩翰林
居職羨久耗墨莊
改舍人僅得存禮
貌鳧塘例得遷尚
木展鷹鷄今年聞
考差前矛有光耀
定擬徙鵬程乘風
鼓萬竅能為大宗
師堪究聖闡奧不
惟窮鬼送且擬高

童山詩集卷三十一
官到利獲豈由弋名高不因釣上達 天子知下慰慈
母孝如何夏徂秋竟又出所料彌月長引領望雲頻落
帽遠信耳難聞幾至目成既昨接汝書來姑聽允言教
鳴鶴在九臯不同俗聲噪老驥志千里肯與捷足掉茫
茫誰復知悠悠付一笑閒宜博羣書悶卽長咏嘯不但
勿尤人亦無怨大造清本散仙高空惜釋家妙如果時
運至自有喜鵲報

潑陽雜詩

緇衣誰授館茅店半顏垣織布晨機跼然燈夜博喧三
星疑在戶兩月不窺園家有蓮池好紅衣落應繁

白紵誰家婦江邊學浣紗草拖裙帶濕花插鬢雲斜年
老誰投果歸期悔及瓜樂遊不知返毋乃頓忘家

題袁生所藏編修查祥西施浣紗圖

西子未蒙寵浣紗猶孑身幸無人鼻掩誰識我心嚮幾
日同村女時來似洛神君如擇佳偶不在婦家貧

狂吟

客有求詩字謹諉不已作此答之
十八轉草笠名九尺步地名也

頭戴十八轉脚踏九尺步腕下走烟雲口中吟月露既
非李謫仙亦非鍾太傅投筆竟出門不知去何處

彭縣詠古十六首

彈丸原是周彭國曾與諸侯會孟津漫把別賢來竊比

老彭便是此邦人 彭國

牡丹舊數古彭稠京洛遺風俗尚留孟氏繁華能幾日

今人猶自說花州 花州孟氏移上苑牡丹植此

土地肥饒號小鄆至今戶口更豐熙牛心山下花如斗

不及良田一畝麋 牛心

東湖春水對西湖髣髴山陰被楔圖昔日樓臺今已圮

茂林修竹有還無 東西二湖西湖為唐元和守王潛蕭祐創東湖宋元符袁鵬有記今俱廢

南樓百堞壓城端湖影山光動赤欄誰似風流文太守

題詩千仞並巔岘 南樓文湖州有回首大岘雪千仞並巔岘句

西北天彭是此州峭青危碧吐靈湫要觀六月岷峨雪

試上西城望雪樓 望雪樓

丹景蒼茫接翠微太妃輦跡半依稀臉脂不用夸嬌蝶

夢裏蘊蘊何日歸 丹景山玉符侍徐太妃遊丹景太妃有蝶嬌類採臉邊脂之句

聞道陽平有遺蹟仙居觀已失金城當年只是尋花柳

今日松風恨未平 陽平

大隋山頭景德寺神照禪師錫所投龍井至今猶作幻

滿山生竹盡龍頭 大隋

金覺禪林有大乘洗腸池憶佛圖澄鹿遊尚有遺民在

閻弱劉璋亦有曾 白鹿山璋曾孫敬曾隱于此後為羅尚所害

八十一洞若魚貫二十四峯相蟬聯至今葛瓚丁東水

疑是韋臯富貴泉

葛瓊山蹟奇臯曰他日富貴無忘葛蹟遂建寺

一泓水濺珠如滴三昧泉盈斗可儲一白知元洗人面

至今百疾盡能除

至德山三昧泉

瀉沅治裏鴻都觀響石關頭白石溝高尚原來于此隱

虛傳范蠡五湖舟

瀉沅治范蠡曾學逆于此

石如蹲獸鑿為船泉向智化環作淵聞道清涼無暑氣

可能借我避炎天

上溪

碧岫丹岑烟樹攢龍懷山本似龍蟠蜀中寺碣多名蹟

只數初唐王子安

王勃龍懷寺碑

九隴雲峯盡出奇二郎功德有專祠石屏不動波濤靜

風雨長留誓水碑

李水誓水碑

江漲二首

迷離烟樹認難真水漲東西不得津何處酬神金鼓震

褰裳多少過江人

不是貪遊久不還故鄉雞犬不曾聞朝來接得城中信

里派添追馬價錢

水蠟燭

竟是天生燭居然照滿川任風吹不熄經雨濕仍燃紅

影搖波直青藜逐浪圓三條思往事天祿愧當年

挽計性成

年來林下孰為儔不是僧流卽道流似我少於時輩可
如君須向古人求琴譜桐爨知焦尾盆接茶花換鶴頭
老圃故人零落盡石瓜樹下哭遺留

今已
拱把

和張玉溪登萬卷樓觀金石古文歌

我家有樓車山北萬卷與山齊巖峩金石古文夙所愛
度置百帖時摩挲吾厝坦腹右軍比平生常換山陰鶩
今年省試遇伯樂驂駟聲價什倍過竒文百戰俱第一
當道自詡能搜羅錦城錄詩遠寄我不敢過譽嫌偏頗
常于酒間舉示客寶光共說如太阿坐令老翁不量力

管兒累月學其哦昨日遊庠枉駕過適我遠出逃催科
興來登樓恣檢閱碑版直欲窮岷嶓百家探討析亥豕
六藝辨析遵止戈斷字能知日月蝕闕文姑任風雨磨
漢隸車馬推石鼓張草蛇蚓分藤蘿畫肚以指各有悟
箝口卒讀俱無訛泰岳秦篆跡豈烏岫嶠禹蹟文非蝌
後代耳食任穿鑿古人伏泣潛滂沱其餘唐宋如水族
但有魚鼈無鼃鼃嗟予老眼昏若霧對古每每形謠歌
野鶩家雞常見誚蠹殘鼠嚙消無多餘編尚留君把玩
得非天遣神守呵與堦猶應勝與外誓將罄送供廟礎
不然水火並劫篋難保一朝其失俄癡人千金買竹篋

蠻觸空笑爭角蝸譬如日月厭菽粟好奇遠想餐天禾
其中真贗誰復辨索垢求癩毋乃苛不如自我且作古
揮毫知我摹伊那後之視今今視昔今尤支派如江河
勸君不必嗜成癖致令百廢嗟蹉跎

九華石歌

何處飛來一拳石鬼斧神椎鑿青碧狂風驟雨送將來
流涎猶帶螭蟠跡我疑蓬萊隕海中海水蕩涵鏤芙蓉
雲窻霧閣嵌窈窕玉樓金闕俱瓌隴又疑太華三峯墜
玉女頭盆皆破碎若非蟻穿九曲珠安得蛇遊百盤地
十洲三島徒空聞視此纔如一菊雲此石焉知天地濶

誓乘羽蓋訪茅君

煉丹臺

在中江縣西四十里黃鹿鎮相傳黃鹿真人得道處

丹成人已去惟有煉丹臺黃鹿幾時返白雲空自來
江江水日悠悠不知春去豈知秋今人不見古時月
月仍照今人頭青青四山草危樓已傾倒獨有登臺人
白嗟髮白早

清江行

并序

為福公出征後藏過綿作也公館之盛亘古所
無因用杜詩綿州公館清江濱為起句

綿州公館清江濱棖題畫桷高閑閣水晶為柱玻瓈楹

四面光射窓櫺明紅羅細疊鞦韆平剪錦百匹懸爲棚
兩廊陳列充琇瑩金枝向夕飛流星九華照耀銅龍繁
洞房尚少卓倚屏花欄紫檀民不寧借問何官不敢名
田禾將軍方進城一齊鐘鼓聲鏗鉤肉山酒海人縱橫
三聲礮作晨登程花欄紫檀俱隨行

九日登函海樓

底事登高向嶺巔危樓百尺可攀天稍看獲盡黃雲後
菊喜初開白露前竈婢能諳作菰飯家僮閒蕩採菱船
年來佳節無絲竹長笛聲從何處傳

謁杜少陵草堂祠

詩自三百後正聲淪憲章流傳經喪亂史官失其詳惟
公起大唐雄文獨有光天寶初應舉起家從鞏昌進士
屢不第歌聲益琅琅名試校兵曹感涕矢身亡適遭祿
山陷奔走逾河梁官拜左拾遺始露列宿芒吁嗟中原
擾兵戈沸螭蟾其時支大厦獨有一汾陽司徒惟不朝
遂令冷戰場更兼燕兵來回鶻何揚揚腥膻遍宇宙馳
突氣益昂練卒不得休三尊誰扶將坐令憂國淚斗斛
不可量時議鄙房瑄保奏披天閭遂觸逆鱗禍謫與凡
鳥頑關輔復大擾孤身復何望竄居同谷間救饑日不
皇採松復拾橡難以充饑腸雖未赴京兆聖恩何敢忘

讀公八哀詩其音皆金商幸有嚴鄭公素厚知公狂奏
明列工部賜緋出廟廊結廬浣花里終隕耒陽鄉至今
草堂寺名與江水長醫國少靈藥疾惡如探湯我公真
詩史俎豆誰同香

武侯祠

南陽原是一名儒魚水君臣萬古無孺子不才非治命
託臣討賊是良圖心悲王業三分鼎力盡偏安六尺孤
綿竹雙忠俱血食可憐累世爲捐軀

忠武岳王廟

何須酒淚向西風名將爲神少善終鐵騎竟當追虜穴

金牌原不出深宮獄成片紙千秋慟名冠中興四將功
畢竟是非經論定一編青史表精忠

和張玉溪見過遊南村別業四首

水繞孤村四面流隔溪修竹逕偏幽維駒客已臨門口
叱犢人猶在隴頭君至已慙重寫鳳我生原是一浮鷗
相逢不用多相屬萬事今如不繫舟

倒屣誰能使我迎非君問渡任舟橫林間鴉婦欣攜偶
架上鸚哥解喚名飯赤却疑霞作伴是日飯供紅穀茶甘終讓
露爲兄晚來攜手樓頭坐要看三更海月生

門長荒苔一徑斜如何強半不還家風殘荷葉空存柄

霜打芙蓉卧放花間領琴僧伴風月時邀道友話烟霞
十年林下歸來晚自泛漁舟着短叉
水居台喚小蓬萊綠檻朱橋一一開不羨有官居殿閣
尚非無地起亭臺池邊撫掌魚同躍松下高吟鶴不猜
除却能詩玉溪子問誰應上此樓來

和玉溪登函海樓放歌

愛君爲人眼能白元龍豈是求田客愛君文似玉溪生
直從碧海掣長鯨平生樓居多惆悵喜君來卽攜同上
萬卷縱橫任溯洄百川環遶同浮漾秋風昨夜林端來
繡桷朱窻次第開造鳳手原殊草舍彩鸞身合任蓬萊

火棗不羨珊瑚赤琪果不讓珍珠紅海山三點看初霽
弱水萬里來長風傾刻天邊月輪起兩人猶在鏡光裏
橫笛何人尚倚樓十月梅花落江水

小築四章章十句

水竹之居吾愛吾宅松陰爲幕草茵爲席徑自我開苔
鮮人跡詩喜陶潛嘯學阮籍樂天安命自適其適
與其看花不如看竹與其樹人不如樹木萬挺臨門千
章繞屋柳堤垂釣桐窻展讀伊與誰隣吾尚未卜
誰謂我貧食不但非誰言翁醉意不在酒懶卽曲肱事
無掣肘陶情絲竹適性花柳問我何名灌園老叟

生雖山居能知水樂願作汎鳧不逐野雀有船有書有
琴有鶴背山築樓臨流起閣老漸當頭收我遊脚

和于溪題余東海人求近著書圖

字織弓衣人價重雞林國古惟白與梅詩名播絕域嗟
我豈其人如海以蠡測虛聲愧昔賢竊祿忝清職丁酉
憶在京被褫心似棘引罪自避嫌僑居宣武側是時遭
國喪躡躑行無力屏戶終日坐面不求人識何方使者
來敲門聲正亟手持書一紙開緘目驚拭求我皇華詩
留伊蔬飯食言自朝鮮來名仰金玉式特奉副使命登
堂見顏色憐其心懇誠贈似千金得並繪我像歸一方

傳典則去後復致書兼索童山刻時已荷 聖明趨雪
罪萬億提學粵海南不復相思憶迄今二十年百憂填
胸臆忽展求書圖淋漓見翰墨爰鵬何時來鵬搏六月
息生隔天一方奮飛恨無翼

萬柳堂四首

大厦初成俯碧波滿庭綠影舞婆娑蠻腰對我者如此
鶯語同聽更有何量到十圍春意少坐來五樹晚烟多
憑君莫唱楊枝曲聽我新翻別調歌

長安曾憶曉風吹萬柳堂邊有所思東閣已空油幕影
北門猶望趨塵絲一時賢輔推龍夾千載文壇屬鳳池

自恨紗籠無分到名堂猶效老鴻詞

萬柳堂原在京城沙窩門外馮相國

溥別業也康熙己未薦舉博學鴻詞諸公出公門下一時最稱得人詩酒唱酬為本朝盛事余牛晚恨不得與故用其名題堂以志仰慕云

小西湖畔四圍青無數垂楊盡日局露葉滴來疑細雨

曉枝稀處見微星院中落絮全堆砌檻外柔條半入樵

猶恐宮墻生外望水中別築最高亭

鳳州曾見好垂楊移向溪邊半列行試問遠遮沽酒店

何如深蔭讀書堂

深柳讀書堂唐劉春虛詩

當門常納三千履夾道

添修十二廊每遇清明桃放候綠紅相間好春光

看雲樓

昨日山中來又向山中去遙指山頭雲我在雲深處

切博 三十韻得切字

唐堯尚土堦夏后變垣墉烏氏始造博陶人改為切每

遇穰稷收適與耒耜別先檢田畝寬後除沙石潔風吹

氣欲潮雨多水宜泄汲遣兩夫洒乾妨十字裂叱犢侵

晨起駕牛終日繼碾去碌碡忙鞭來轂簾懶地既如掌

平人亦忘口啜拖刀形似犁負索力盡竭直比牽絲繩

深剛合車轍法全賴起盤光半疑冷鐵其利玉能斷不

舍金可剗劃泥如劃餅履刃如履雪布指便知尋舒肘

未妨掣似葱不爽寸如竹剝為節一翻一塊成再剗存

童山詩集卷三十三
六
甕揭到手已萬餘過眼纔一瞥片刻疊崇墉午景方樹
臬擬磚尚須磨名坯因待蕪富豪候出窰貧家便取挈
予房墻苦卑卜築匠未徹夏霖遭汎漲秋井塌園缺有
客什邛來謀洗前工劣許易新甌離窰付舊畛暇不日
看成功維時正寒冽何但索絢乘兼借茅廬結外加朱
粉飾不異雕鏤案救急甚燃眉廢食豈因噎莫學陶侃
還寧守扈累拙

童山詩集卷三十三

綿州李調元雨村

甲寅

得同年侍御祝芷塘書却寄

并序

自余歸蜀後聞芷塘亦歸海寧蓋不通消息者
十年矣今年春初其門人新都侍御李尚菁
棧回川始得手書乃知在雲間主講全家浮寄
並云病中無可消遣刪改舊詩每遇彼此唱酬
之作覺當年飛揚跋扈之氣綢繆繾綣之情如
在目前前後奉懷詩甚多錄之不勝其錄故勿

寄也又云天涯海角此生殆無相見之期讀竟
爲之黯然因先以詩寄之萬里迢迢不知何時
到也

一函書自浙東來喜極須臾變作哀君尚在耶鱗竟犯
我雖生也背如鮐老來那有三魚夢天下爭傳一鶚回
倘念將軍頑似故松江莫惜寄驢顛

六十一效白樂天體作五古三十韻時寓舊綿州

萬壽宮

五十已衰頹六十尤羸弱何況又加一氣血日瘦削鬚
戟半如蝟髮皓已似鶴妻怪宵矢遺人驚晨齒落入喉

需沸湯暖胃惟熱藥膈温荳蔻煎口適茱萸粥常時尚
可支八月痼必作發時終夜呻嘔餘數日惡絕糧如在
陳復歸乃於毫延醫走什邡嘗羹始一勺就暗亦扶鳩
回陽乃躍雀應作蟲坏蟄底事燕巢幕昨日來涪城意
似到沙漠風射愁壁穿雨侵嫌幔薄每代人糊窓常破
已慳橐直疑貌爾身不知何處著幸儻萬壽宮寬可三
畝廓終朝只在樓經旬不下閣舊方畫葫蘆新膠戒杯
杓但慮心腹希難逢手足託攬衣嘆僕遲饋藥少兒嚼
有客誰磨門無伴自携鑰掩關苦慙悶攀鞍欠雙鑠却
憶梓里安不受萍踪泊偶寒婢添衾稍饑妾捫酪半背

擁宋郊一捻憐沈約况有園植花適我池初鑿縱令缺
謳歌何至全寂寞思之暮年宜畢竟在家樂誓當歸去
來勿為識者謔

一碗水

天女洗頭盆移入華山裏至今此山中尚留一碗水

玄武山

玄武形成龜與蛇我來登磴日初斜虎頭粉壁今何在
化作雲山一半霞

大雄巖下碧潭清如彈如拳細石生天付巧工琢棋了
看人黑白角輸贏

山下潭中產黑白花石邑民琢為棋子以售好事

中江斗山山長王敏亭提中邀遊玄武山用杜甫

題玄武禪師屋壁韻

六十已齊頭高懷濶九洲三嶠誰作主四海得名流自
小原名鶴知交獨有鷗除君誰益友最畏共僧遊

同王敏亭遊聖泉用王勃韻

一線來千嶂朱闌護碧泉竹間聽有韻松下響無絃渾
若來川上翻嫌住縣前蘭薰應得句好共寫雲烟

酌松風韻野絃王子安原句也

西橋水并序

西橋水中江西門江也自綿州來經羅江縣至

此始可舟古巴歌云豆子山打瓦鼓陽平關撒
白雨白雨下取龍女織得絹二丈五一半屬羅
江一半屬玄武卽此水也橋不知圯於何時而
羅江東門橋爲邑令楊周冕所建今亦圯因爲

作歌

白龍昨夜嫁龍女狂風驟雨忽他徙珠奩百寶俱隨行
遺下正絹化爲水此絹龍女親織成二丈五尺魯量清
水絹盡是鮫人淚誰家拾得寧容情急遣雷電下索取
半屬羅江半玄武兩家相爭不肯還並造雙虹鎮江滸
白龍勃怒兩師行豆子山前瓦鼓鳴倒捲雙虹入海去

年年渡口無人行絹歸龍宮波濤止一橋方成一橋圯
君不見玄武西橋已如此羅江東橋又如彼

王敏亭以韻扇見遺作詩謝之並和其韻

并序

韻扇者內府銅版所刻佩文齋詩韻也字如蠅
頭粘於便面以便作詩檢韻一日同遊北郊福
建館小酌孟石軒以松牋乞余書敏亭創逐字
限韻法余遂隨指鋒饗供三韻限茶罷各成七
絕敏亭詩先成余詩亦就遂以書牋旣而敏亭
以扇見贈先是邑令毛明府見招乞書未答故

云

筆掃千軍未脫鋒昨宵深愧飽官饗韻雖便取詩才退
只恐難將筋力供

附同作

斗山書院山長

王捷中

江陵諸生

鐵畫銀鈎不露鋒飽看書法勝朝饗興來寫罄南山
竹萬斛踰糜不足供

中江雜憶詩十首 并序

中江名勝莫備於宋邑令眉山程建用叙與蘇
東坡一書書云中江與東蜀號爲劇邑以衰拙
臨之始至若無暇泊半年而滯獄清期年而庶
事稍就叙乃謀葺亭臺池館之舊則西園之勝

有環翠亭焉亭面北而枕南相傳以薛公田所
建也庭前兩株桐挺直無節目高二丈餘枝葉
扶疎亭後甃石爲山傍植紅蕉三面控掩以墻
墻間列詩碑皆薛公與其子球任本路憲日並
歷政諸公所作表百有五十丈曰樂閑亭亭之
後爲願正堂夾堂皆植花果堂之東爲潛閣閣
之前牡丹數叢深紫色此蜀花之鮮有也閣後
懸窻窻外竹百餘本紫如葦纖如筍森如束高
出簷際皆廖公子孟劄植文公同爲之記其亭
雄狀冠於邑居西有臺高丈餘榜曰觀風登臺

倚闌其南北與西境山川歷歷可觀惟東則爲
亭屋懸樓之所蔽西有栖妙山山有洞田真人
所居也今爲集虛觀古記云此地舊多惡蟲蛇
唐廣德中真人自南陽來卜居其地遂絕此患
南江自綿之神泉縣來衝山足已而東走百五
十里至郡城下合涪江東江來自涪城歷馬橋
鎮過五成山至玄武山下入於南江二江之水
冬或可涉夏秋積雨往往漲至數丈爲墊溺之
患歷政禦以隄防惟廖公有碑亦與可之文也
五成在邑之良地山頭有二圓崖高徑各丈餘

俗號挺眼以邑民多頑悍稟賦於是前令修堤
命匠者塊之以爲堤址今無矣觀山之狀而詳
其名則五成者取爲壇五成之義今以成爲城
誤也玄武在邑東其山周回三里六屈三起有
龜蛇之像焉昔之邑名與山皆取於此僧寺枕
其麓榜以大雄而玄武之象實寓其中其下有
淵淵前後石大如拳小如彈連延五七里有龜
甲之文者又有蛇蟠之形者濱江之民琢之以
售好事此物理之不可考也觀風臺之南有一
亭亭壁塑亂山榜曰栩栩厓取夢蝶之義昔官

于此者或譏其晝寢彼固以此爲名建用因而
廣之以塑峩眉山景而致其意焉建用昔寓峩
眉六七年歸吾鄉而卜居於北郊則又遠與之
直每春晴秋曉則夫蒼翠嶒嶒巍然當吾廬之
門自從官於茲別是山也不爲不久而歸遊未
有期故形於塑塑匠邑民也亡慮百餘人凡兩
川釋宮老廟之象與夫豪貴之家欲狀山川禽
獸草木之類莫不出于匠邑選其匠之尤者而
指示以圖于是曲盡其妙自公之暇近而觀之
由其足而循之以至于頂磴道橋閣相屬如線

僧寺山洞皆如其地蟄雷之穴光相之巖枯木
飛瀑鮮不悉備恍然以爲昔年之旅寓也遠而
觀之瑣碎不能分而大勢橫抹天半忽然以爲
出吾廬而倚衡門也嗟乎玩其塑以爲真其迷
可笑然窮其真亦何異於塑而玩之者未能離
形骸之內則真塑何所往而非迷况區區之跡
旅寓之年與夫去北郊之居逾二紀矣淒然傷
齒髮之暮而彼崔嵬者不失其故不知冥冥中
去者彼亦不得而遞此於道未明者之所爲豈
可以累於通人哉建用欲易栩栩之名而記其

所以塑壁之意恨才力之不逮故舉一邑之大
槩以似明公雖蕞爾之地不足以挂文翰亦願
明公命一名撰一記使不才之人得以附諸末
幸也子瞻答書云軾啟自別承久多難流落百
事廢弛不復通問獨吾兄不忘疇昔時枉遠書
感怍不可言讀別紙所記山水園亭之勝廢卷
閉目如到其間所要亭記豈敢于吾兄有所惜
但多難畏人不復作文字惟時作僧佛語耳千
萬體察非推辭也遠書不欲盡言所示自是一
篇高文大似把飯叫饑聊發千里一笑會合無

期臨書悽然按宋詩紀事建用字彙仲眉山人
熙寧進士又茗溪漁隱叢話東坡言余幼時里
人程建用楊咨家弟子由會草舍中大雨聯句
六言建用云庭松偃蓋如醉楊咨云夏雨淒涼
似秋軾云有客高吟擁鼻轍云無人共喫饅頭
卽此人也合觀程蘇兩書則中江勝蹟全在西
園惟樂閑亭文與可丹淵集記作堂世代歷更
陵谷互易問之邑令毛公不但不能指其地竟
不知其名而縣志草索並此兩書失載因全錄
之以附毛公兼依建用書中所記亭臺堂閣及

近山古蹟作西園雜憶詩十首亦願當事者補之乘末庶不至前賢名跡湮沒不彰也

憶昔西園客競題薛家環翠剗荒基問誰詩可垂立武

杜甫何曾自立碑何年顧虎頭粉壁書滄洲杜甫題立武禪師屋壁詩

憶曾遍訪樂閑堂廖尹新移自福昌亭閣只今誰畫得

湖州有記當元章文同丹淵集樂閑堂記云河南廖君自福昌移至此

憶昨仍題願正堂夾堂花木盡芬芳任從改換官名姓

難誑山高與水長願正堂亦廖令所題官今仍之而改書已銜也

憶堂東首有潛閣無數牡丹開紫紅閣外懸窓窓外竹

子猷安得入堂中

憶臺名自榜觀風三面雲山空檻中只有正東看不見

烟霞隔斷庾樓風

憶聞此地夢中俱栩栩亭前夢亦無莫怪居官多晝寢

宰予亦是孔門徒

憶余曾上峩眉頂又有峩眉在凱州認假為真原不假

眉樓休認作述樓

憶登棲妙話田真躡浪猶如履地平安得道人驅虎術

管教猛虎絕無聲

憶昔廖君新築堤捍災彷彿似沉犀如何不見民傳說

只有丹淵記哀題

憶昔蘇程中表親庭松偃蓋句猶新大蘇不作西園記
作吏如程有幾人

寧國寺

寧國寺前長閉門入門秋草正縱橫不須響壁教親拍
口有家中絲竹聲

獨遊西山登集虛觀

江風慣吹而山雲慣隨身隔城望集虛便如夙昔親獨
立風何狂飄飄吹衣巾雲獨似相招喚渡遵江濱拾級
上叢祠乃無主與鄰闕洞聚蝙蝠豆田窺鷓鴣深林下
夕照乃始歸城闕明日人競傳山中有仙人

宿趙家渡有館人爲子納姻而欲易余榻戲答之

冷館闐然燕燭光欣聞有鳳欲求鳳簫吹碧落鸞方跨
橋隔銀河鵲亦忙尚喜主人容半榻何妨內客竟中堂
老夫正要壘宮任玉杵今宵聽搗霜

聞婿張玉溪

懷澁

秋闈榜發獲雋作詩賀雲公親

家

老斲輪原讓若翁英年獲雋與翁同怪君頗有譽兒癡
似我方稱擇婿工陪謙草堂如昨日先參棘院坐春風
人間快事無踰此佇看烟樓一撞中

甲寅九月十四日中允余秋室

集

副郎中范攝山

鑿典試蜀闈榜發回京道過綿州枉駕見訪適余
遊中江不值以書問訊兼寄所畫蘭扇並索函海
作二律答之

庶子春華久擅名新聞到蜀柄文衡出京方識詞臣貴
入里羣驚鄉聲宦榮畫裏芳蘭君子贈手中紈扇故人
情平生頗有名山業不遇名人不肯呈

雖在林泉不在家一年強半客烟霞行踪頗似孤山鶴
尊大休嗤井底蛙似我非逃高士竹惜君未識故侯瓜
不慙李卻天文淺未得觀星候使車

題春坊余秋室所畫金蘭卽用自題見寄元韻金

蘭者用泥金筆也

扇有風蘭分外涼春葩原不怯秋陽寫來底用金都斷
只取同心不取香

附自題所畫蘭扇呈雨村前輩中允余集秋室
錢塘

墨沼風生翠葉涼秋光又喜到重陽素心不在繁枝
葉三兩莖花一國香

十二月初五日玉溪來祝余壽並告以明正將赴
春闈作詩二首因和其韻兼以誌別

懸弧纔過壽筵期又賦乘龍北上詩倚馬萬言真快婿
家駒千里當吾兒讀書目或十行下得句時參一字師

更擬潺亭春水動看君破浪上雲途

九重是我舊巢痕累葉無人繼國恩此去上林枝定借
應聞大樹號猶存玉壺冰鑑知非謬清廟明堂品最尊
倘遇故人相問訊為言寂寞老江村

附

張懷漑

來朝走馬定行期奉祝翻成奉別詩一劍橫腰如健
僕六經使熟似呼兒西川才子吾推岳東粵文章衆
所師此去滕前勞想望五雲深處是天逵

和成斧鑿見詩痕問字常蒙拭目恩漫道燭花三夜
結須教椿樹百年存書厨勝許外人看詩話嚴於老

吏尊多少名卿皆後輩問翁何故老南村

哭大壻候選廣文何異齋耀茹

老來亡壻不勝悲萬斛泉如涕泗垂官僅廣文無命受

通觀察有何遺名能蓋世曾三薦才可匡時未一施

黃泉差自慰嶄然頭角有佳兒

不信斯人竟玉埋蓋棺未定尚疑猜今年會祇謀三面

昨日書猶寄四顯三日前曾寄雙魚臨死無言惟跪叔即九知

君遺恨在孤孩南村詩話留名句千古臺山不夜臺壻

山

寄姜太史爾常勸余主講錦江書院詩以辭之

野鶴山猿孰肯收只宜林下任悠遊平生從未居函丈
老命何堪換束脩况有笙歌蛙兩部難離奴婢橘千頭
題詩寄與姜夫子病馬如今不受鞦

傳粉塗朱滿面描當年同院本輕佻誰容絳帳兼攜樂
肯為臯比別愛嬌能坐豈無時雨化出行常畏朔風飄
老來更以人為暖只恐諸生認宋朝

再和姜太史主講見寄原韻

十年從未入州城只有江鷗與狎盟若道太平真氣象
書聲畢竟讓歌聲

附

庶吉士 帶姜錫嘏爾常
部主事 內江

三年奚不到蓉城高據文壇作主盟一席錦江君就
否歌聲聽罷又書聲

童山詩集卷三十四

三

童山詩集卷三十四

綿州李調元雨村

乙卯

正月初二日題曹大姑壁

今年春興比前超鑼鼓隨身破寂寥高親去聲家中啖牛脯

曹姑宅內喫猪腰人逢日暖神增爽鳥遇天晴語倍囂

我妹明年交六十管絃預當賀生朝

初六日借何九臯人鶴河村觀燈

不到元宵已管絃况逢狂友更欣然雖無寶馬香車逐

都把山猿野鶴牽贏得春盤先到口偷隨年少共摩肩

童山詩集

卷三十四

一

明朝定有人傳說兩個詩翁老欲顛

紅梅八首 并序

陸生見麟家有紅梅一株大可拱把色分深淺
 蓋燕支點絳二種接成也每年春開爛若赤雪
 生魯分二本貽余余紅梅書屋所山名也今年
 乙卯人日自携家樂邀何九臯同觀主人置酒
 其下聽演紅梅傳奇為作一律異日州尊廬陵
 王雲浦 用儀 首以詩寄和既而綿竹令清江楊
 實之 學光 什邡令會稽甯湘維 錡 彰明令河陽
 馬海明 元龍 陸續繼和於是遠近聞之自仕宦

縉紳以至釋道女媛和者不下百餘人余亦自
 和疊至八首遂成紅梅詩社可為此花生色矣
 陸生彙為紅梅唱和集亦可謂好事也為綴數
 語於首

一種春風兩樣分漫言間色奪繽紛淺深絳染江邊雪
 遠近皴烘嶺上雲人倚闌干同笑語天教閨苑入芳羣
 當筵更奏紅梅曲要算霓裳再得聞
 玉皇初降曙光分臚唱花魁侍從紛御酒醉吟二滴露
 賜緋披下九重雲人間桃李俱無色天上瓊林獨冠羣
 回憶朱衣曾暗點頭名姓字愧無聞

施朱施白總難分瘦質清姿尚未紛洗出朱砂疑是雨
迎來紫氣欲成雲春風有面微醺酒明月無情不入羣
自是君身換仙骨丹砂妙訣可容聞
漏息春光恰二分暗香疎影已紛紛笛聲吹落燕支雨
鼎氣熏成寶燄雲丹的似經宮女點珠丸如擲狹邪羣
可憐不作朱門客只許鄉村赤子聞

吐萼含苞渾不分開時濃淡漸紛紛喚來酒點疑仙雨
綴遍丹丸訝火雲呼作紅兒應不稱依然青女配爲羣
休言薄命朱顏誤如此清粧共艷聞
問誰司練絢微分着意烘成繪藻紛林下美人疑彩虹

山中高士卧紅雲近筵豔奪茜袍色入戶羞同朱履羣
自是羅浮仙種別等閒蝴蝶不知聞

籬落墻隈一徑分每逢春到必敷紛偶因疎雨攙紅雪
爲傍斜陽化彩雲笑頰豈邀詩老愛酖顏應入醉翁羣
色香俱備真佳偶和靖求妻恐未聞

翹首蠻牋並未分詩人聚和早紛紛雙身影並瞳矐日
萬蕊香堆匝匝雲媚態不因醫獺髓啼妝豈是學妖羣
自從落盡鉛華後空谷覺然更弗聞

附同作

何人鶴九臯

一株開作兩株分詩老平章爲解紛酒列聖賢如孔

孟梅稱兄弟是機雲花因連理魁誰占色為爭妍黨
不羣自昔東坡題唱後新詩又向雨村聞
附和詩 奉和李太史雨村先生紅梅原韻

綿州知州王用儀 雲浦 盧陵

眼底春光併十分成溪桃李愧紛紛百花頭上霏紅
雨千樹叢中起絳雲却似鮫綃染猩色居然鶴頂邁
鷄羣朱顏似有天公惜連日東風靜不聞

綿竹縣令楊學光 實之 清江 癸丑進士

占斷春光有幾分橫斜疎影絕塵紛亭前點絳飄紅
雪嶺上舒丹貫彩雲祇恐冰容難入俗畧施朱粉也

超羣江南江北如相憶化作雙身處處聞

有那縣令 人 窳 錡 湘 緝

百里方亭古治分紅梅幾樹亦繽紛絳姿雖遜南村
雪丹彩還連北郭雲詩友只尋姑射侶醉粧誤入壽
陽羣謫仙已入羅浮夢幾度招呼總不聞

彰明縣令 人 馬元龍 海門 河陽

衝寒破臘幾時分放出梅花異樣紛花瘦清霜枝瘦
月光蒸赤日艷蒸雲西湖賞去誰同伴東閣移來信
軼羣樂奏霓裳供笑傲雨村韻事搔馨聞

河南固始縣 人 張邦伸 雲谷 漢州 令已卯舉人

庾園春色正平分粉萼朱苞照眼紛姊妹誰家同醉
月弟兄揆藻總凌雲初開合倩霞為帔遙望居然寬
與羣東閣邇來添韻事兩番驛使寄新聞

江西盧元錦書榮
靖江

誰家仙種醉中分淡掃濃粧色互紛訪去孤山疑落
日望來太史欲書雲朱顏為爾巡簷笑紫色休教亂
服羣遙憶蜀州多雅詠盧生夢裏幾曾聞

漢州張懷溥用山

寒暖枝頭影自分畧加顏色便繽紛題詩官閣飄紅
雪載酒清江指絳雲人立春風如共醉夢回明月本

同羣揚州水部空相憶只有東坡得共聞

故庠生曹
錫寶之配李小蘭季香

鴛鴦一樹被風分無葉扶持落自紛晚節誰憐人似
雪曉粧懶逐女如雲紅顏薄命多新感白髮回頭憶
舊羣驟雨狂飈今漸少忽傳兄句到門聞

二月三日至團堆壩訪孟時三丈適入山尋藥不
遇見葉贊之天相毛殿颺德純兩秀才携尊邀至

梓潼宮觀劇底暮盡歡而散

故友携尊枉駕過一龕同佛聽笙歌山中客去尋知母
江上人來得刺婆蜀謂鱸為
刺婆魚古寺僧稀松葉少戲場人

散蔗皮多

甘蔗冬窖春賣兒婦尤喜噉之戲場為甚多嚼其汁而棄其皮與渣焉

十年不

到團堆壩白髮看看奈老何

綿竹楊明府實之座上詠牡丹戲贈

牡丹如斗占春芳不枉嘉名錫作王八面雕闌居北極

四圍錦幃擁東皇垂頭露重如扶醉對面風來掩衆香

別有好花眉欲語勾他叛呂又何妨

我欲勾他叛呂防趙雲松戲袁子才

寵客劉霞裳句也楊明府時有寵客宋桂欲從余學故借用之

春遊

莫問山巔與水涯農夫相見話桑麻從吾所好絲兼竹

匪我思存酒與花拄杖拋來行尚健軟輿到處便為家

無官却有君知否布被朝朝放早衙

閏三月三日綿竹楊明府實之坐上偕姚占愚淳

汪小泉心源盧晝榮元錦及余牡丹聯句

公餘開小讌實之閏月趁花期國色無雙譜雨村春風

第一枝古愚玉樓人醉後心泉金屋貯嬌時漫說姚黃

種書榮名花出晉熙實之

訪沈新園崇德席上奉贈并序

新園寧夏人本儒士隨祖寓蜀以祖習行伍拔

至綿竹汎官非其志也未幾告退築室於邑之

南郊閉門課子蒔花自娛非知已不得見不役

奴僕惟使二婢一曰黃菊一曰紅梅而紅梅尤
知書識字客至則呼出侍酒故末句及之

偶過南郊訪隱淪武身忽變作文身園枯第五橋邊路
屍倒開三徑裏人獨坐梧陰親課子時烹菜甲爲留賓
誰言東閣紅梅落又見闌干笑語頻

連山舟行四首

連山水渴漸成汀傍水漁家戶半扁艇載鷓鴣人載艇
一肩風過滿江腥

舟小須妨重載沉中艙只着二三人忽然大噪舟全覆
赤脚行江更爽神

謳謔載道亦堪聽乃是村中演小伶水漲烟田苗盡紫
岸崩土餅草猶青

舩行兩岸似飛還蘆荻齊天恨不刪聞有好山名未好
炎天誰過火盆山

遊連山觀湧泉

混混茫茫湧不休聞爲塘堰放爲溝不知蛟掉多長尾
見說牛沉已數頭滾滾珠璣千畝灌邨邨穰極萬家收
天公狡獪殊難測能使民愁亦解愁

雲谷接玉溪京中信傳余已作古人以書見示因
戲答之

去年一病輒兼旬此話傳來亦有因科第已如禠廟王
姓名都似隔朝人老而不死真原壤疾爾何勞假洞賓
用田重進事從此天公應不管免教重鑄二回身

附得岳翁書深喜無恙和韻呈寄

張懷漑

書來剛記隔三旬始悟流言未有因天地多情留此
老山林有幸着斯人選樓仍見青編富柱杖應添節
首賓細把新詩再三讀却疑恐是再生身

玉溪和前韻見寄並錄前作挽詩見示復次韻答
之

當年伏枕命如絲豈意流傳異物疑死後招魂猶易返

生成傲骨恐難醫怪來夢裏常逢壻早已靈前暫代兒
從此名山採仙藥但吟茱老不吟詩

紛紛名利究誰強冷眼看來總杳茫蝴蝶夢飛猶自樂
蚊虻暫過又何妨此身且聽風飄梗轉瞬惟愁海變桑
到底百年終有盡果然此是復真堂

附聞岳翁已作古人為位哭之作挽詩二首

張懷漑

忽傳凶信淚如絲命也天乎聽轉疑方謂高年能健
飯緣何小病竟難醫倚閭心切思同父撫柩情疎愧
當兒西蜀暮雲頻悵望不堪再讀送行詩

去年臘底記康強追憶音容轉渺茫詩可名家生不負文能壽世死何妨篋中書剩三千牘身後田餘八百桑他日小西湖畔路童山重拜舊祠堂

前蜀學使吳壽庭

樹萱

任滿回京道過新都邂逅

話別後至綿驛復寄長句求余拙詩依韻答之

長笑貧兒室無有欲以千金享敝帚長羨富家擁阿堵屏當未盡藏身後多錢善賈詩亦然讀破萬卷錢貫朽君詩過於王愷富綾錦珊瑚充左右我詩甚於原憲貧捉衿見肘難抖擻君乃把飯仍叫饑豈能脫出君窠臼自君爲蜀大宗師眼如懸鏡辨白黜首選余墮作青錢

果掇巍科庶無負我時錦城方遍遊只有君門不敢走何期今年持節回始康相逢初握手古人神交只立談今人面交神不久木鐸有舌已徧搖石鼓無聲安用扣一代文章仰雙桂千古高人歸五柳相期壽世惟有詩只今誰是知詩友送君此去會何期莫言老悖非吾偶他年再麾旌旄來家釀尙可傾百甌詩成人已在天上天上可曾一回首

附綿州館驛寄懷雨村觀察

吏部員外
督學四川吳樹萱壽庭
吳縣

官職本非有生有棄之奚翅却敝帚江山風月作主人詩名獨占千古後挂斗大印不足竒破萬卷書真

不朽慕先生名卅載前識先生面雙桂右升菴故里
暫停車名紙忽枉驚抖擻此邦文獻溯丹鉛後二百
年傳螿曰几几之曷岌岌冠六十鬚眉較我黜三載
相思欲往從咫尺南村竟虛負傾葢畧申茶薜香匆
匆車騎復東走我來看遍蜀山春蜀山盡入先生手
以樓函海海函曾開闢天地共長久曾從玉潤問冰
清洪鐘却笑以莛扣撫卷能窺意匠真夏雲之峯曉
春柳莊耶佛耶兼有之此福此慧誰與友西川江水
六朝山醜園隨園差並偶後學逡巡乏羔雉獻以長
識供覆瓿木瓜何敢望瓊瑤但乞先生詩一首

八月十二日中州李鶴林

振青

邀錦江主講姜太

史爾常張固始雲谷及余遊浣花溪置酒少陵草

堂諸人戒不作詩惟鶴林畫墨蘭數枝粘杜祠壁

屬題

寄語詞人漫浣牆文章那得杜光芒鶴林解得真詩意

畫筆蘭花當瓣香

帶草堂西荷見招肯教杜老笑蘭茗風流試問今誰似

四海詩人鄭板橋

九月十四日余姪朝塏榜發得雋是日回家祭祠

適新都侍御李尚菁

陽城

自新都來賀邀同觀劇

酒間舊疾復發翌日侍御問病口占答之尙菁時
初起服
骨瘦如柴漸不支賀筵薄醉便支離人間好友歸田少
天下傳人在蜀誰其可再乎忙止酒未爲晚也急刪詩
數年假我天容否尙有樓頭書未窺

丙辰

春初與玉溪同賦梨花限魚字

不到國園數月餘梨花依舊放春初似知玉潤詩人到
故露冰肌仙子如倚檻月斜猶見蝶臨池雪落誤吞魚
老大病起行常怯只向東欄在板輿

河村雜詩

今年夏雨太紛紛一望河村綠似雲莫道農夫書不讀
秧田井字插成文
菱溪衝雨過菱溪隔樹誰家叫午雞松筵泥深人未到
忽然返照竹林西

河村戲場

并序

村間以戲酬神謂之戲場見陸放翁詩所謂雨
足豐年有戲場也時方五月河村演青苗戲余
往觀之遇雨宿曹大姑家適社首送腰臺至遂
大醉書於壁間腰臺者社首於優人午臺任演

時以酒肉相勞之名也

本因祈雨酬神戲翻為雨多酬不成贏得豚蹄兄妹共
腰臺多謝社翁情

高步雲親家問作詩法

詩思無涯語要該摘章琢句費安排請看大呂黃鐘調
畧錯宮商韻總乖

南村

南村樂事我能知布穀催耕早駕犁秧束即將秧當草
竹林多折竹成籬鴨雛生以雞為母農父心將犢作兒
符得秋收婚嫁起家家婦子樂熙熙

小樓初成

小樓結構稱家囊也費錙銖細較量何必仲將自安榜
定無荀濟畫吾堂有時赤脚登初級無數青山入短牆
莫怪屋椽都用竹知音誰是蔡中郎

馬尾口逢白雲山住持海珠乞詩作七律一首與
之

入山偶遇白雲客却恨白雲山未登聞說來從峯萬丈
自言親造殿三層祖師怛化無非佛名宦前生半是僧
道是曹溪人不信黃梅能數六傳燈

春暮過陳華國園亭

亭似一拳小曾經三次過開窻花氣入倚枕樹聲多壁
有龍蛇活門無鳥雀羅老來愁骨冷爐火送春和

再題新市鎮店壁

新市今來第二遊荻花依舊映清流笙歌老後聽無味
酒盞拋來孰與酬冷暖人情似冰炭腹心奴僕亦戈矛
昨宵聞得山鶻語底事當歸不肯休

石橋灘雨漲宿觀音堂二首

石橋灘上一庵孤霹靂雲垂樹若無水滿秧田全斷路
雨添柳港半成湖每爲醉者所推罵竊喜人皆不識吾
魚服由來多溷跡何妨濁淖共奔趨

不是雲遊是雨遊欵門無怪宿難投白頭正欲一庵卧
青眼誰能十日留隴上稻香知歲稔墻邊花豔任人偷
何時否運翻成泰問卜思從季主謀

得袁子才書奉寄二首并序

錢塘袁子才前輩已未館選宰溧陽調江寧遂
解組不出於金陵築隨園以終老余嘗讀其詩
想見其人曾於視粵學時刻其詩示諸生乙卯
余同年王心齋純一回金陵乃肅楮候問今年
五月十四下江紅花客船到從心齋信得接子
才書娓娓千言不啻覲面兼寄近刻七種並索

余函海以數所傾慕之人一旦得聞警欬不勝
狂喜因作二詩奉寄

仙山無路得登龍忽得隨園書一封七集寄來如拱壁
千詩讀罷若撞鐘天分吳蜀何時聚人是東南一大宗
只合黃金鑄臨汝幾多名士瓣香供

子才真是今才子天賜江淹筆一枝要與江河同不廢
獨開今古別成奇詩名不讓少陵占遊屣惟應宗炳知
天下傳人當首屈不知附驥更爲誰

附奉和李雨村觀察見寄原韻

己未庶吉士袁枚

訪君恨乏葛陂龍接得鴻書笑啟封正想其人如白

玉高吟大作似黃鐘童山集著山中業函海書爲海

內宗西蜀多才今第一雜林合有繡圖供

蓬島仙人粵嶺師栽培桃李一枝枝何期小稿蒙刊

正竟示羣英謬賞奇面與荊州猶未識音逢鍾子已

先知醒園篇什隨園句蘭臭同心更有誰

寄祝袁子才八十用尚書畢秋帆前韻兼以奉

懷

夙仰奇文萬丈光君於李杜別生芒六七月間始通訊
八十老來猶報章才吏何妨官百里散仙不在展三長

如今髦鬢行將過仍說披吟日夜忙

寄到雲箋萬口傳蜀中人競寫新篇若仍對策同梁顛

倘使同舟或郭仙地占六朝多勝蹟天教一老享高年

問君願養遵何術莫是曾餐太華蓮君曾檢發陝西以縣令用未補即歸

何人不識小倉山獨我無緣未款關老始接談徒紙上

向曾選句遍坊間也貪花酒偏多壽儘有交遊不碍閒

自歎問奇空有志天涯無奈鬢毛斑

真是礮溪一隱淪非熊不夢夢長生遲方得子真英物

晚序同人半大賓文通雞林通異域詩傳蛾黛滿江濱

有名有壽君兼占借問從來有幾人

附 祝袁子才前輩七十

尚書湖廣總督畢

沅秋岷
太余

巋然江左一靈光星宿羅胸句出芒山水靜留真歲

月烟霞絢染好文章何人御李思懷刺此事推袁果

擅長春到杖頭原不老雙丸物外任他忙

元相才名出禁傳雞林紙貴豔新篇筆雄繡虎詩兼

史影落飛鳧吏即仙綠字養心花養性碧山同壽鶴

同年回思上表成婚日曾撤明光寶炬蓮

園裏樓臺江外山盍簪曾記欵雲關地兼綠野平泉

勝人在青蓮玉局間官職拋纔全福占詩名成爲半

生閒別來未取紅衫浣猶帶倉山冷翠斑

十八名場半隱淪鹿啣芝草伴長生六朝風骨餘金
粉五岳真靈作主賓燕喜尊開蘭渚會鳳簫聲遠洛
川濱祝鳩寄語須珍重已未詞臣有幾人

十八名場半隱淪
鹿啣芝草伴長生
六朝風骨餘金粉
五岳真靈作主賓
燕喜尊開蘭渚會
鳳簫聲遠洛川濱
祝鳩寄語須珍重
已本詞臣有幾人

